


T 5198/0.81

39

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1938



西江志卷第八十七

人物 二十二

饒州府 一

漢

吳芮秦時番陽令也甚得江湖間民心號曰番君黥布初歸
 芮芮妻之因舉兵應諸侯沛公攻南陽遇芮將梅銷與偕
 攻析酈降之及項羽相王以芮率百越佐諸侯入關立芮
 為衡山王項籍死上以銷從入武關故德芮徙為長沙王
 一年薨諡曰文王子成王臣嗣初文王芮高祖賢之制詔
 御史長沙王忠其定著令至孝惠時封芮庶子二人為列
 侯傳國數世絕 前漢書

按漢書稱芮為番陽令而一統志豫章書皆以芮為番

哈佛大學漢和
 圖書館珍藏印

陽人又按梅銷爲芮將史記漢書不載何許人楚紀以爲長沙人粵大記以爲越人一統志云銷馮軍山死葬梅港軍山在南豐縣南梅港在餘干縣人物志遂以銷爲餘干人未敢信也

陳靖字康叔餘汗人慷慨有大志憤王莽篡漢王常起往赴之會盜聚長山喻以順逆盜張柰意氣頗異人靖舉酒喻曰漢室中頽君能爲國反正樹功當效薦引柰謝曰敢不從命遂集義兵得千餘人赴常常大喜署爲中牙典軍校尉御戢有方得江湖人心常見光武首言靖功授散騎常侍以母老乞歸養封餘汗侯

豫章書

雷義字仲公鄱陽人初爲郡功曹擢舉善人不伐其功嘗濟人死罪罪者後以金謝之義不受金主伺義不在默投金

於承塵上後葺理屋宇乃得金金主已死義乃以付縣曹後舉孝廉拜尚書侍郎有同時郎坐事當刑義默自表取其罪以此論司寇同臺郎覺之委位自上乞贖義罪順帝詔皆除刑義歸舉茂才讓于陳重刺史不聽義遂佯狂出走不應命鄉里爲之語曰膠漆自謂堅不如雷與陳三府同時俱辟二人義遂爲守灌謁者使持節督郡國行風俗太守令長坐者凡七十人旋拜侍御史除南頓令卒官子授官至蒼梧太守

後漢書

張遐字子遠餘汗人生元嘉間七歲日記萬言年十一通易大義常謁徐穉從穉過陳蕃會蕃問吳炳易太極炳曰太極在混沌之時蒙昧未分老子謂一物混成先天地生是也蕃然之時郭泰在坐穉曰此張遐也知易義蕃問遐遐

曰易無定體強名太極太者至大之謂極者至要之謂蓋言其理至大至要在混沌之中一動而生陰陽陰陽者氣也所謂理生氣而氣寓夫理者是也泰顧炳曰遐得之矣蓄驚服為舉孝廉補郡功曹不就建寧間召為五經博士五年遷洪都門學士以疾還里

豫章書

按餘汗因水以名縣漢書淮南王田於餘汗是也應劭注汗音干元和郡縣志隋開皇九年始去水存干曰餘干在漢時合稱餘汗林志以遐為餘干人蓋未攷耳又云遐所著有四書注按朱子始以語孟學庸為四子書前此亦未有其名張遐事漢書既不載疑出後人附會故削而不錄

晉

陶侃字士行鄱陽人徙家尋陽早孤貧為縣吏廬江太守張夔察侃為孝廉至洛陽數詣張華華與語異之除郎中尚書樂廣欲會荆揚士人武庫令黃慶進侃於廣人或非之慶曰此子終當遠到後舉侃補武岡令與太守呂岳有嫌棄官歸為郡小中正會劉弘為荊州刺史辟侃為南蠻長史討賊張昌破之以軍功封東鄉侯陳敏之亂弘以侃為江夏太守敏遣其弟恢來寇武昌侃出兵禦之所向必破以母憂去職服闋叅東海王越軍事江州刺史華軼表侃為揚武將軍使屯夏口元帝加侃奮威將軍遷龍驤將軍武昌太守流亡者歸之盈路侃竭資賑給焉帝使侃擊杜弢破之賊增兵來攻使朱伺等逆擊殺傷甚眾王敦表侃為使持節寧遠將軍南蠻校尉荊州刺史領西陽江夏武

昌鎮沌口又移入沔江遣朱伺等討江夏賊殺之王貢與杜曾舉兵反侃為所敗坐免官以白衣領職復率周訪等進軍入湘使都尉楊舉為先驅擊杜弼大破之敦奏復侃官王貢來降弼敗走進克長沙獲其將毛寶高寶梁堪而還王敦深忌侃功左轉廣州刺史以王廙為荊州侃將鄭攀蘇溫馬儁等不欲南行西迎杜曾以距廙敦意攀承侃風旨將殺侃參軍梅陶長史陳頌言於敦曰周訪與侃親姻如左右手安有斷人左手而右手不應者乎敦意解侃便夜發進至始興杜弘與溫邵劉沉俱謀反侃擊破之以功封柴桑侯侃在州無事輒朝運百甓於齋外暮運於齋內人問其故答曰吾方致力中原過爾優逸恐不堪事太興初進號平南將軍尋加都督交州軍事進號征南將軍

開府儀同三司及王敦平遷都督荆雍益梁州諸軍事領護南蠻校尉征西大將軍荊州刺史侃性聰敏勤於吏職恭而近禮愛好人倫嘗語人曰大禹聖者乃惜寸陰至於衆人當惜分陰諸參佐或以戲談廢事乃命取其酒器蒲博之具悉投於江時造船木屑及竹頭悉令舉掌之咸不解所以會積雪始晴廳事前猶溼以屑布地及桓溫伐蜀溫嶠邀侃同赴朝廷推為盟主部將彭世斬峻於陣峻弟逸復聚衆侃與諸軍斬逸於石頭改封長沙郡公加都督交廣寧七州軍事以江陵偏遠移鎮巴陵遣諮議參軍張誕討五谿夷降之郭默矯詔襲殺平南將軍劉胤輒領江州侃遣將軍宋夏陳修率兵據湓口以大軍繼進默將宗

侯縛默父子詣降侃斬默等詔侃都督江州領刺史侃移鎮武昌命張夔于隱為參軍范逵于珽為湘東太守辟劉弘曾孫安為掾屬凡微時所荷一殮咸報遣子斌與南中郎將桓宣西伐樊城走石勒將郭敬使兄子臻竟陵太守李陽等共破新野遂平襄陽拜大將軍劔履上殿入朝不趨讚拜不名上表固讓疾篤又上表遜位以後事付右司馬王愆期侃輿車出臨津就船明日薨於樊谿年七十六諡曰桓尚書梅陶曰陶公機神明鑒似魏武忠順勤勞似孔明陸抗諸人不能及也謝安每言陶公雖用法而恒得法外意其為世所重如此子十七人洪瞻夏旗斌稱範岱見舊史範最知名太元初為光祿勳

晉書

陶瞻字道真少有才器歷廣陵相廬江建昌二郡太守遷散

騎常侍都亭侯為蘇峻所害追贈大鴻臚諡愍悼

同上

陶臻侃兄子字彥遐有勇略智謀賜爵當陽亭侯咸和中為

南郡太守領南蠻校尉卒官追贈平南將軍諡曰肅

同上

陶輿侃兄子平南將軍臻弟果烈善戰以功累遷武威將軍

初賊張弈本中州人元康中被差西征遇天下亂遂留蜀

至是率三百餘家欲就杜弢為侃所獲諸將請殺其丁壯

取其妻息輿曰此本官兵數經戰陣可赦之以為用侃赦

之以配輿及侃與杜弢戰敗賊以桔槔打沒官軍船艦軍

中失色輿率輕舸出其上流以擊之所向輒尅賊又率眾

焚侃輜重輿擊破之賊望見輿軍相謂曰避陶武威無敢

當者後與杜弢戰輿被重創卒侃哭之慟曰喪吾家寶軍

皆為之垂泣詔贈長沙太守

同上

范逵鄱陽孝廉嘗過陶侃時倉卒無以待賓其母截髮得雙
髮以易酒餽樂飲極歡雖僕從亦過所望及去侃追送百
餘里逵曰卿欲仕郡乎侃曰欲之困於無津耳逵過廬江
太守張夔稱美之夔召為樅陽令有能名遷主簿侃之聲
名逵發之也仕至會稽太守

同上

南北朝

何渢餘汗人有膽略元嘉間捕盧循將韓英有功授本邑令

林志

唐

林士弘饒州鄱陽人隋季與鄉人操師乞同起師乞自號元
興王大業十二年據豫章以士弘為大將軍隋遣劉子翊
射殺師乞士弘收其眾戰彭蠡子翊敗死遂大振眾十餘

萬據虔州自號南越王俄僭號楚稱皇帝任其黨王戎為
司空臨川廬陵南康宜春豪傑皆殺隋守令以附北盡九
江南番禺悉有之後蕭銑以舟師破豫章士弘獨有南昌
虔循潮之地銑敗復振武德五年王戎獻南昌地士弘遁
保安城素人相聚應之為張善安所察以兵赴討會士弘
死其黨乃散

唐書

按士弘于隋末起兵奄有江西嶺南之地僭號改元太
平歷有年所事雖無成亦李密王世充之流亞也林志
豫章俱不載今據史傳補入

陳饒奴饒州人年十二親亡寡弱居喪又歲饑或教其分弟
妹可全性命饒奴流涕身丐訴相全養刺史李復異之給
資儲署其門曰孝友童子

同上

蔡明遠鄱陽人唐時為本邑校顏魯公絕糧明遠載米濟之
魯公憐其意手書以贈盛傳於世

安志

吉中孚鄱陽人官戶部侍郎與盧綸韓翃錢起司空曙苗發

崔峒耿漳夏侯審李端皆能詩齊名號大曆十才子

唐書

李儼字雅之餘干人大曆進士德宗時為左司諫方士桑道

茂奏奉天有天子氣上欲屠其城儼諫曰陛下始登元極

當懲忿窒欲選賢任能以安社稷乃輕信妖言以害生靈

乞斬道茂上悟乃止遷淞西節度判官歲饑活數萬人

林

志
按人物志儼大曆間進士林志以為神龍訛今改正

張鵬德興人宣宗時為河南節度書記吐蕃賀繼部落犯邊
堡鵬率數千騎敗之上嘉之賜朱衣金魚懿宗立表為瓊

管五州招討使入為羽林金吾二將軍屬蠻人渡瀘鵬疏

溪洞情狀攻守備用出為邕州刺史制置使尋拜嶺南西

道節度使

豫章書

張敖德興人善韜略咸通間官節度使唐時節度專擅國命

咸通後雖么麼無不牽連為逆敖獨守正奉公拓境興學

驅浮屠為民盡人臣職事人多其忠征西夏有功封饒郡

公爵至上柱國

人物志

黃勉德興人咸通十四年黃巢寇長安勉與李克用合兵討

之有功後追封保靈王

同上

李濤少以文學名僖宗時舉為河陽令尋舉進士光啟三年

吳楊行密興義兵於江淮濤儒服謁軍門協贊大計會賊

將秦彥陷揚州行密哀兵進援濤以所部為前鋒奏補都

尉未幾進爵押衙檢校右散騎常侍兼御史大夫四年以功補右押衙繼遷刑部郎中復擢戶部尚書同上

按豫章書有李潛無李濤人物志亦不詳何許人

甯賡鄱陽人同弟襄聚義兵拒黃巢保饒歙二州以功官御

史大夫 豫章書

余鐸餘干人唐尚書勲六世孫乾符二年黃巢陷饒州所至焚蕩鐸與鄱陽彭幼璋起義兵保障於白雲城下巢黨復來屢出奇拒之民賴保全立祠祀之 林志

董全楨德興人天祐中為殿中御史時朱溫篡唐淮南節度使楊渥檄傳興復全楨兼八砦將首分守鄱陽賊忽自浙至兵寡戰敗乃自斷其首已而雷電晦暝如有戈甲甚盛賊大驚潰全楨猶於馬上自挈其首以歸邑人廟祀之 豫

章書

姜岨樂平人性至孝庭生連理樹刺史韋頌署曰孝行有聞

兄弟兼美陶我王化毓此休祥 林志

沈普樂平人以孝聞居親喪有至行所居及墓俱產芝草 安

志

後五代

童發字以達德興人博學有弘度仕後晉為都統功曹尚書

僕射天福間契丹寇中原後漢劉智遠自立以改元問發

發流涕乃悟仍稱天福曰予不敢忘晉 林志

李德柔字予懷鄱陽人性鯁直不阿為大理寺卿時元宗欲

置北寺獄諫曰世豈乏士使閹寺得弄文墨邪議遂寢 同

上

李延鄒鄱陽人爲滁州錄事參軍時周世宗盡取淮北州郡
滁州危急團練使郭廷謂欲降命延鄒草降表延鄒責以
忠義廷謂以兵臨之延鄒擲筆曰大丈夫終不負國爲叛
臣作降表廷謂殺之唐主命其子以官

人物志

周惟簡鄱陽人隱居明易後主聞其名起布衣爲集賢殿侍
講以虞部郎中致仕還山金陵被圍思得奇士可使兵間
者起授給事中副徐鉉使宋太祖召見惟簡奏曰臣本野
人未嘗與聞使指伏聞終南山多靈藥願得棲隱太祖許
之金陵平命爲國子博士久之上表請解官遂初志

唐餘

紀傳

宋

金君卿字正叔浮梁人慶曆進士歷官秘書丞知臨川權江

西提刑入爲度支郎中嘗著易說有文集十五卷

林志

馬遵字仲塗樂平人嘗以監察御史爲江淮發運判官就遷
殿中侍御史爲副使以言事謫知宣州後復爲右司諫以
禮部員外兼侍御史知雜事改吏部直龍圖閣性樂易喜
議論其言事不爲激訐杜衍范仲淹皆稱道之

宋史

按馬遵事蹟宋史所載止於此人物志叙其彈宰相梁
適及爭歐陽修賈黯等補外事不知何據今從史傳刪
去林志云遵所著有直清集今不傳

張日新安仁人皇祐間爲廣西邕州都監儂智高陷邕日新
力戰不支被執不屈死

林志

熊本字伯通鄱陽人慶曆進士熙寧初瀘川羅晏夷叛以本
察訪梓夔兩路本曰彼能擾邊者以十二村之衆乃誘其

首領誅之諸夷皆從風而靡願世為漢官奴神宗曰熊本
不傷財不病民一旦去百年之患檄奏詳明可嘉也河湟
初復以本為秦鳳路都轉運使奏省官百四十員減浮費
數十萬渝州南川獠人木斗叛詔本安撫夔路木斗以漆
州地歸得五百里為四砦九堡建南平軍元豐中知滁州
廣州召拜工部侍郎會宜州蠻擾邊道除龍圖閣待制知
桂州至則溪洞酋長請選將練土兵以代戍守益市馬以
足騎兵宜州遂無事召為吏部侍郎以疾乞補外除龍圖
閣待制知洪州再知杭州未幾卒有文集奏議共八十卷
東都事略

王仲舒字茂先浮梁人慶曆進士歷越州推官池州軍判攝
彭縣移宿州推官攝符離縣處煩治劇有能名以包拯薦

遷昭義節度推官再遷太子中允賜五品服以疾辭熙寧
歲饑勸分給食累贈朝奉大夫著有野人集人物志

章穀字仲弓餘干人慶曆進士授興遠簿遷資州軍事判官
著作郎賜緋衣銀魚通判秀州船寇千餘殺掠沿海州郡
呈制置司得軍二千人又鄉兵二千人出隘口防禦寇至
督戰瀕死又明日寇大至與戰大敗之生擒二百人斬首
三百人民始寧未幾以疾卒同上

程適字遵塗樂平人仁宗朝以恩調尉再調簿三調錄叅一
朝棄官請老朝廷方崇激廉退擢適太子中舍制詞褒美
英宗登極進勲騎都尉賜緋魚同上

湯夏字起翁安仁人天聖進士倅黃川築城禦儂智高歷知
泗泉宣三州有政聲仁宗手勅褒美同上

西江志 卷八十七
程節字信叔浮梁人嘉祐進士熙寧間朝廷有事南方單騎
銜命撫諭諸蠻上語苗時中曰程節真奇才遷廣西運使
帥桂府甚得蠻情官至寶文閣待制著有竹溪集子鄰字
欽之亦負將才節卒諸蠻反側廷議以隣代蠻帖服如初
林志

程筠字德林節弟嘉祐進士授縣令時新法方行筠條其不
便調知陳留均田賦平徭役不避權勢戚里訴之太后曰
筠廉吏吾可撓其政耶擢戶部郎中知真州蘇軾美之以
詩有君爲赤縣有古風政聲直入明光宮之句同上

張綬字文結德興人嘉祐進士權將作監丞按實昭宣使宋
用臣不法事神宗直之後除太府少卿蔡京議置大錢綬
力諫不便曰慶曆已行矣自是忤權臣久歷外任著有梅

堂詩集

同上

彭汝礪字器資鄱陽人舉進士第一王安石得其所著詩義
善之以爲國子監直講擢監察御史裏行汝礪首陳十事
曰正本任人守令理財養民賑興事變苗役鹽事指擿利
害多人所難言者王中正李憲臨邊汝礪曰漢唐以兵付
中人多致敗事神宗折之汝礪拱立不動伺間復言神宗
卒爲改容罷爲江西轉運判官久之代還爲京西路提點
刑獄元祐中拜中書舍人吳處厚繳進蔡確詩諫官交章
請治汝礪曰此羅織之漸也且上疏論列兼蔡確有謫命
汝礪遂罷知滁州召爲兵部侍郎徙刑部會有巨獄汝礪
以爲不可殺與執政異徙禮部又徙吏部紹聖初進尚書
言者謂汝礪附會劉摯罷爲寶文閣直學士知成都府又

西江志 卷八十七
降待制知江州卒年五十四汝礪居家孝友與人寡合然
有志於善平時與蔡確異趣確被貶又爲之力辨人以此
賢之所著有易義詩義奏議詩文五十卷 東都事略

周文敏安仁人篤學敦行不求聞達嘗與周濂溪講性理之
學於廬山濂溪甚起敬曰周君自是一團和氣門人侍郎
天臺劉洪誌其墓曰直氣摩虹古人之風萬卷蟠胸學者
之宗 人物志

彭汝方字直老汝礪之弟以蔭補太廟齋郎後知衢州時方
臘陷歙睦杭而衢介于三郡之間賊勢張甚兵力寡弱衆
皆奔潰汝方與郡僚段處約守孤城城陷罵賊而死年七
十一贈龍圖閣直學士 東都事略

按宋史汝方謚忠毅事略失載

張吉鄱陽人母方娠其父仝客遊西蜀不還吉爲兒時與彭
汝礪同學嘗有詩云應是子規啼不到至今我父未歸家
及長入蜀尋父往返者三其父遂以熙寧十年歸自蜀彭
汝礪贈以詩云河可以竭山可徙我翁不歸行不已三往
三復翁歸止翁行方壯今老矣兒昔未生今壯齒 鄱陽集

按張吉林志失載安志不詳今采彭器資詩序撰補

董鉞字毅夫德興人治平進士任夔州轉運使遇事剛果耿
介不羣致仕歸過黃州蘇東坡和鉞歸去來詞有左手引
妻子右手抱琴書之句鉞自奉清約家無擔石儲所積惟
圖書滿篋而已 人物志

董乂字彥臣德興人治平進士累官大理寺卿進樂書釋青
囊經遷敷文閣待制封華亭縣開國男哲宗累賜劄問且

題門牌云數封天子詔兩代帝王師

林志

史邈字守易浮梁人行端學博熙寧進士爲司農主簿王安石薦其才神宗召對與語大悅之擢兵部郎中太平通判後以議新法不合退而授徒講學遠近翕然從之號曰江

東夫子

人物志

洪彥昇字仲達樂平人元豐登第調常熟尉歷殿中侍御史孤立任言責論蔡京再居元宰假紹述之名敗壞先朝法度朋奸誤國公私困敝願蚤賜英斷遣之出京何執中緣潛邸之舊德薄位尊願解其機政以全晚節遷給事中嘗謁告一日而張商英復官之旨經門下言者以爲顧避封駁出知滁州尋加右文殿修撰進徽猷閣待制知吉州久之知潭州未行卒

宋史

朱尹字湯輔浮梁人舉元豐神童科召入禁欽慈皇后置膝上而撫之賜金錢玉果歷潭州司戶叅軍零陵令辟勾當公事進比部郎中建炎間使江淮上曰卿文學政事有聞於時所以選委

人物志

程博文樂平人舉進士王安石當國問趙抃江南人物抃以博文對自開封戶漕擢爲條例司首上豢羊事歲減費十八萬緡出知南劍州州有灘甚險博文請以度牒募僧鑿治妖氛起龍門博文縱囚使擊賊自効賊平囚亦如期還積官至司農少卿湖南運判

林志

都隨字與時餘干人元豐進士有節操嘗以太常少卿使遼宣上威德遼使至亟問隨起居稱曰長者官至宗正少卿

同上

張根字知常德興人甫冠第進士調臨江司理參軍遂昌令當改京秩以四親在堂冀以父母之恩封大父母而馳妻封及母遂致仕得通直郎如其志時年三十一鄉人賢之屏處十年曾布曾肇鄒浩及本道使者上其行義徽宗召詣闕上言請罷錢塘製造局未幾通判杭州提舉江西常平言本道去歲捐租四十萬而戶部責償如初祖宗立法運上供額而給本錢數百萬緡使廣糴以待用比希恩者乃獻為羨餘故歲計不足至為無名之歛詔貸所蠲租而以糴本錢還之六路改淮南轉運使以水災多乞蠲租賦散常平青苗米賑貸流民後以朝散大夫終於家

宋史

張樸字見素根之弟以進士歷官太常少卿侍御史鄭居中去位樸言朋黨分攻非朝廷福又劾郎員庸繆者十六人斥諸外升祕書少監

林志

鍾傅字弱翁樂平人本書生用李憲薦為蘭州推官紹聖中入對命幹當熙河涇原秦鳳三略公事夏人陷金明渭帥毛漸出兵攻其沒煙砦傅合擊破之又與燕州王文郁進築西安城論功加祕閣校理章棗帥渭命傅所置將苗履統衆會涇原之靈平夏人悉力來拒傅步騎二萬出不意造河梁以濟師遂作金城關又獻白草原捷連進集賢殿修撰知熙州傅自始仕至此僅再歲遂擅帥熙秦俄責監永州稅再貶連州崇寧中復起知河中府歷鄆瀛渭三州擢顯謨閣待制歷知杭州真定永興太原延安府以故職卒

宋史

按傅因李憲章惇之薦而得官史稱其欺妄故屢起屢

債云

都頡字光遠餘干人少貧苦學讀書過目輒成誦元祐中嘗作七談述番陽山川人物之盛三千餘言七日而成辭艷意遠自謂比太沖十稔平子十二而無歉官至奉朝請司

農少卿 人物志

馬存字子才樂平人元祐省試論以揚雄劉向為題存論曰方王莽以險怪愚弄天下學士大夫高節尚潔者非引去則繼以死龔勝以清死鮑宣以悍死其憤甚矣雄斯時方著劇秦美新論以發揚其盛讀之令人氣拂膺不懌者累日嗚乎雄乎寧死爾其忍為此文哉典舉蘇軾奇之置高等京師競傳因呼為拂膺公庭試策言臣之深思常略於東南而獨在北方詳定官蘇轍喜其遠慮欲以冠多士同

列間之抑居第四授鎮南節度推官再調越州觀察推官紹聖三年卒存蚤游太學研經以考道觀史以究治亂之變搖毫頃刻數千言文學錡一時文集二十卷行世 同上

章公弼字右夫餘干人紹聖進士授建寧主簿聞朝廷廢劉摯范純仁托疾不起丁母憂廬墓三年以御史趙挺之薦累官禮部侍郎以疾歸有文集若干卷 林志

金極字克中樂平人紹聖進士宰分宜上書乞斬蔡京以謝天下坐是入元祐黨黨禍解適意閒曠以市隱自號扁其廬曰醉鄉紹興初詔贈太常博士 同上

許中字與極樂平人元符進士與修會要六家謚法書成除校書郎歷兵部官出知虔桂二州進直寶文閣歷知鼎桂揚三州再知虔州在虔則繕治城隍在桂則撫綏巽峒在

鼎則截總餉以寬民力在揚則拓泮宮以淑青衿置義塚以收白骨敷歷中外多善蹟

人物志

程瑀字伯寓浮梁人其姑臧氏婦養瑀以為子姑沒始復本姓少有聲太學試為第一累官至校書郎為臧氏父母服服闋除兵部員外郎金人入侵求可使者瑀請往未行會欽宗即位議割三鎮命瑀往河東秦檜往河中瑀奏臣願奉使不願割地不報至中山諸將已得密諭城守不下瑀與金使王訥俱至燕山還除左正言金幹離不與粘罕爭功故幹離不欲和粘罕欲戰朝廷遣人齎蠟書約余覩皆為粘罕所得瑀因言金兵圍我重鎮數月不能解豈能出塞共謀人之國莫若遣使議和然後謹飭邊備徐觀其變帝嘉納之高宗即位召為司封員外郎遷光祿少卿國子

司業請祠主管亳州明道宮尋召赴行在條上十四事皆切時務以敷文閣待制知信州胡安國劉一止言瑀忠信可以備獻納正直可以司風憲不宜去遂復留未幾以徽猷閣待制知撫州提舉江州太平興國宮居父母喪服除知嚴州徙宣州復奉祠俄召赴行在除兵部侍郎兼侍讀晉兵部尚書檜既主和瑀議論不專以和為是檜忌之改龍圖閣學士知信州降朝議大夫卒年六十六檜死瑀子孫乃免錮有奏議六卷

宋史

程不器樂平人元符進士出守廣德時方臘兵熾廣德實兵衝增陴浚隍峙糧練士為守戰計臘知有備引去子移忠字孝嚴以父蔭入官歷建德尉池州戶曹戢奸吏有能譽親嘗寢疾七年移忠夜不解帶視湯藥執喪癯憊過制

以孝名 人物志

張甲字大用德興人建中靖國時為邕州巡檢政和中金兵犯順力戰死德祐元年詔贈忠利侯 林志

洪楫字元濟樂平人累官直祕閣充編修國史靖康後乞祠里居適趣林泉起知撫太平二州料州兵以平劇盜發義廩以活饑民恩威甚著性雅淡為政不務赫赫聲 人物志

董濬字禹川德興人崇寧進士除太學錄徽宗賜對陳治道千餘言授祕書少監時有東宮官奏罷讀孟子濬力詆其非謂使東宮獨不得聞仁義之言堯舜之道乞罷言者上善之出為江西提刑知興仁府召對言為治在於力行先自治以定大業數百言尋請老所著有五行新書周官辨疑大成書等集 林志

張擴字彥實德興人崇寧進士授國子監簿遷博士調處州司工曹事盜賊竊發守知其賢委以郡擴臨事精明威名大著名為祕書省校書郎尋充館職因議和固執以為不可遂求補外 人物志

方孟卿字正夫德興人崇寧進士擢直徽猷閣出為淮南荆湖轉運使值金兵至淵聖密召諸路入援孟卿募兵赴難遷右司諫所著有奏議十卷 林志

余應求字國器德興人崇寧進士歷官監察御史奉旨言事三月間六十餘疏權奸忌之謫監達州茶稅召為吏部員外郎遷朝議大夫封鄱陽縣開國男 同上

李轍字遵道浮梁人崇寧進士歷知巴陵俗薄惡至父子異居轍躬示孝弟俗遂變調繁昌時國步艱難民力凋瘵煦

煦撫循惟恐不及歲嘗歉稱貸以給足每郡調苛急多沮格以身當之卒於官民悼而祀焉同上

汪天任字莘老浮梁人大觀進士歷知汀州時方行王安石字說天任獨守六經不變所著有易說語孟新意同上

陶節夫字子禮鄱陽人晉大司馬侃之裔第進士起家為廣州錄事參軍知新會縣廣守章棗重其材棗帥涇原辟入府崇寧初為講議司檢討官進虞部員外郎遷陝西轉運副使徙知延安府招降羌有功築石堡等四城石堡以天澗為隍可趨惟一路夏人害粟其間以千數既為宋有其首驚曰漢家取我金窟塢亟發鐵騎來爭節夫分部將士遮禦之斬獲統軍以下數十百人擢顯謨閣待制龍圖閣直學士方議城銀州諜告夏人已東節夫料必西趨涇原

遣裨將耿端彥疾驅至銀州五日成城夏人果從涇原至則城備已固遂遁去進樞密直學士尋領經制環慶涇原河東邊事言今既得石堡又城銀州西夏洪宥皆在吾顧盼中橫山之地十有八九興州巢穴淺露直可以計取遂陳取興靈之策會朝廷罷經制司且棄所城地節夫乃求內郡徙洪州改江寧府歷青秦二州知永興軍卒宋史

李椿年字仲永浮梁人政和進士歷官度支郎中除顯謨閣兩浙運使檢括隱漏別為圖籍凡二十四條該盡田畝形勢閱七月告成升戶部侍郎權吏兵兩部封普寧郡開國侯所著有易說及文集林志

程達字彥通浮梁人性好學老彌篤登第八官輒乞祠樂於教人多所成就所著有易解語孟直解五經解題同上

程汝能字公才德興人端蒙之祖天資純篤不由學問孝弟忠信自有以絕人母得末疾三年衣不解帶處家慈愛而能嚴子弟不敢為非理事沒三十年鄉人言之猶有出涕者父諱宏亦有鄉行

朱子集

柴元祐字益之鄱陽人通五經尤長於易以窮理盡性為本四方從學者眾湯漢饒魯李伯玉皆其門人所著春秋尚書論語解易繫中庸大學說宋名臣傳題所居齋曰強恕

門人稱曰強恕先生

林志

汪藻字彥章德興人入太學中進士第調婺州觀察推官稍遷江西提舉學事司幹當公事尋除九域圖志所編修官再遷著作佐郎出通判宣州提點江州太平觀投閒凡八年高宗踐祚召試中書舍人時次揚州藻多論奏宰相黃

潛善惡之遂假他事免為集英殿修撰提舉太平觀明年復召為中書舍人兼直學士院擢給事中遷兵部侍郎兼侍講拜翰林學士屬時多事詔令類出其手嘗論諸大將擁重兵寢成外重之勢且陳所以待將帥者三事後十年卒如其策紹興二年除龍圖閣直學士知湖州上言古者有國必有史故書榻前議論之辭則有時政記錄柱下見聞之實則有起居注類而次之謂之日曆修而成之謂之實錄今踰二十年無復日曆何以示來世乞即臣所領州許臣訪尋故家文書纂集元符庚辰以來詔旨為日曆之備制可尋貶秩停官予祠六年修撰范冲言日曆國之大典比詔藻纂修事復中止恐遂散逸宜令就閒復卒前業詔賜史館修撰餐錢聽辟屬編類八年上所修書自元符

庚辰至宣和乙巳詔旨凡六百六十五卷升顯謨閣學士
 遣使賜茶藥尋知徽州徙宣州言者論其嘗為蔡京王黼
 之客奪職居永州卒二十八年徽宗實錄成書右僕射湯
 思退言藻嘗纂集詔旨比修實錄所取十蓋七八深有力
 於斯文詔贈端明殿學士藻通顯三十年無屋廬以居博
 極羣書老不釋卷尤喜讀春秋左氏傳及西漢書工儷語
 多著述所為制詞人多傳誦

宋史

按汪藻所著有浮丘集

許尹字覺民樂平人政和進士歷知興化永處柳邛五州皆
 有善政高宗時攝蜀帥甚得人心進司農卿總川賦不忍
 重腴民力以便宜積財粟孝宗即位尹奏乞延儒臣講求
 治道尋以敷文閣學士致仕有文集數十卷

林志

鮑昱字季明浮梁人政和進士歷辰荆洪州教宰祁門通判
 融州時帑庾匱竭昱攝州事戢奸貪謹出入用日以饒乃
 新學宮申教令上下翕然譽之移和州除江南東路安撫
 制置司叅議昱有定力不為浮議所惑故所至有聲子安
 行安國孫升之俱登進士第

同上

許亢宗字幹譽樂平人登政和第初授揚子尉入為國子博
 士同編修九域志轉太常博士遷司封員外郎金始與宋
 講交聘命亢宗充賀生辰使夾攻之捷金雖歸我幽燕實
 謀深入使還及疆彼已轉糧發兵躡其後亢宗入覲密以
 聞大臣方誇邊功不聽靖康初擢起居舍人尋請祠

志

人物

李潤字仲行浮梁人政和進士歷官司封員外郎言選法朝

廷是之權吏部侍郎以人才困於資格選法壞於因循延訪汲引剗弊殆盡嘗使金歸述山川關寨以備異日屯守上慰勞之官終敷文閣待制

林志

洪皓字光弼番陽人少有奇節政和進士建炎三年帝將如金陵皓上書言內患甫平外敵方熾若輕至建康恐金人乘虛侵軼宜先遣近臣往經營俟告辦回鑾未晚時朝議已定不從他日帝問宰輔近諫移蹕者爲誰張浚以皓對時議遣使金國浚又薦皓擢徽猷閣待制假禮部尚書爲大金通問使至太原留幾一年金遇使人禮日薄及至雲中粘罕迫二使仕劉豫皓曰萬里銜命不得奉兩宮南歸恨力不能磔逆豫忍事之邪粘罕怒流遞冷山雲中至冷山行六十日距金主所都僅百里地苦寒四月草生八月

已雪穴居百家陳王悟室聚落也悟室使皓教其八子或二年不給食盛夏衣麤布嘗大雪薪盡以馬矢然火煨麪食之金主以生子大赦許使人還鄉皓與張邵朱弁三人在遣中金人懼爲患猶遣人追之及淮而皓已登舟十二年七月見於內殿力求郡養母皓自建炎已酉出使留北中凡十五年同時使者十三人惟皓邵弁得生還而忠義之聲聞於天下者獨皓而已八月除徽猷閣直學士提舉萬壽觀兼權直學士院侍御史李文會劾皓不省母出知饒州尋居母喪言者猶謂皓睥睨鈞衡終喪除饒州通判李勤又附檜誣皓作欺世飛語責濠州團練副使安置英州徙袁州至南雄卒年六十八帝聞嗟惜之復敷文閣學士謚忠宣皓雖久在北廷不堪其苦然爲金人所敬所著

詩文爭鈔誦求鋟梓既歸後使者至必問皓為何官居何地惟為檜所嫉不死於敵國乃死於讒慝皓博學強記有文集五十卷及帝王通要姓氏指南松漠紀聞金國文具錄等書子适遵邁 宋史

按林志以忠宣傳列于諸子之後又叙事太略今從宋史節存其槩

向伯奮字元伯樂平人以蔭補官攝開封脫死囚甚眾靖康國難伯奮監在京市易務時帑藏充羨金人求索旨令押本務物輸之伯奮憤惋止用藥物雜品數輦隨以往詞直色厲金人信不疑尋聞偽詔棄官去高宗召知建州帥襄陽擒劇賊李彥猷王大漢甚著威聲當路薦其才召對陳四事上偉之孝宗嗣位擢戶部侍郎奏兵貴精不貴多黜

老儒選精銳使人人可用則兵不冗財不匱尋得祠劉權王宣竊發廣右起知靜州伯奮威名素著至則約日出降後改知筠州復祕閣修撰 人物志

按伯奮所著有時論奏藁詩集

魏安行字彥成樂平人以進士授善化丞乞治劇自效得宰弋陽鑿渠洩水以灌民德之張浚薦知滁州滁當兵後景象荒耗安行至浸成樂土改京西漕言事忤時相謫官起知吉州治行為江右冠除戶部郎中進屯田十二策擢直敷文閣淮南運副提領營田事尋請祠卒 林志

張燾字子公根之子宣和八年進士第三人靖康元年李綱為親征行營使辟燾入幕建炎初通判湖州明受之變賊矯詔俾燾撫諭江浙燾不受上既復辟遷中書舍人以集

英殿修撰提舉江州太平觀明年以兵部侍郎召金使張通古蕭哲至行在朝議欲上拜金詔燾曰陛下信王倫之虛詐發自聖斷不復謀議便欲行禮羣臣震懼罔措必已得梓宮已得母后已得宗族始可議通好經久之禮今彼特以通好爲說意謂割地講和而已奈何遽欲屈而聽之一屈之後不可復伸廷臣莫能正救曾魯仲連之不如豈不獲罪於天下萬世秦檜患之燾亦自知得罪託疾在告和議成范如圭請遣使朝八陵遂命判太宗正士裒與燾偕行九年五月至永安諸陵朝謁如禮自鄭州歷汴宋宿泗淮南以歸所言皆切中時病秦檜方主和惟恐少忤敵意悉置不問成都謀帥上曰張燾可第道遠恐其憚行檜以諭燾燾曰君命也焉敢辭十月以寶文閣學士知成都

府兼本路安撫使尋乞祠以李玘代之燾自蜀歸卧家凡十有三年檜死舊人在者皆起燾除知建康府居二年進端明殿學士兼侍講以疾力辭不許除吏部尚書金使施宜生來燾奉詔館客宜生本閩人燾以首丘桑梓動之宜生於是漏敵情燾密奏早爲備遷大中大夫復知建康府隆興元年遷叅知政事以老病不拜臺諫交章留之除資政殿大學士提舉萬壽觀及家固求致仕卒年七十五諡忠定

宋史

徐衡字季平樂平人以進士業遊太學遇朝建武學慷慨讀孫吳書試中武舉第一薦擢右職重和元年秋諸路大水時衡司江東西廉訪因命任兩路賑濟衡籍官民廩得粟五百萬斛錢十五萬緡又截留上供米隨所在貯之計口

西江志 卷八十七
給貧多所存活又治舟楫以濟涉醫藥以療病葬埋以卹死施舍以免責蠲賦緩刑皆且奏且行之詔下其法於諸路尋提典廣東刑獄廣有鉅盜劉隆者猖獗十年爲一方患衡單車造壁賊遂出降

人物志

張杞字南軒德興人宣和進士授登州牟平縣尉靖康之變從二帝北狩七年乃謀航海歷八月登錢塘岸調婺州司理叅軍有童子六七人以瓦石相擊誤殺一人首從不分將盡置法杞曰童子何知一日殺數人吾不忍卒從輕論改以薦擢監察御史歷吏部侍郎典詮無私縉紳歸重紹興己巳充金國信使勅賜笏帶名馬以寵其行還陞吏部尚書封永寧郡開國男

同上

鮑琚字德彰浮梁人登進士攝安仁令召除軍器監使鈞考

東南財賦琚收分閫兵入直宿衛遷右司員外郎進直敷

文閣知鎮江改廬州兼淮西安撫使

林志

程振字伯起樂平人少有俊才徽宗幸太學振以諸生高第得官提舉京東西路學事振奏立孟子祠以公孫丑萬章從祀入爲監察御史兼太子舍人初見太子言古者大祭祀登餽受爵必以上嗣旣禮經所載元豐彝典具存昨上有事明堂而殿下不與非所以尊宗廟重社稷太子矍然曰初無人及此者由是驟加獎重欽宗受禪召拜吏部侍郎及聞金寇河北力請合諸路兵犄角擊之以牽其勢且曰彼猖獗如此陛下猶欲守和議而不使之少有所懲創乎欽宗是其言不能盡用也爲刑部侍郎金邀天子幸其營求金不已振與梅執禮等四人同死之年五十七振天

姿和厚有醞藉至論事則挺然不可回奪方徽宗崇尚道家之說振至東宮從容及之曰周公作鴟鴞之詩孔子以為知道其言不過迨天之未陰雨綢繆牖戶而已他日太子為徽宗道之徽宗以為然及靖康中振尹京府言利者頗離間兩宮振善於調護由是無纖介之疑既死人皆出涕後贈端明殿學士同時死者陳知質安扶失其傳東都事略

按林志振于端平中追謚剛愍東都事略宋史皆失載石昉字德輝樂平人宣和進士授龍州司工曹事以靖康元年之官明年金兵入陝官吏失守惟隴守劉化源誓死不
去檄昉權倖與昉畫地分守力不支金兵執之勒換授執不可盡室二十三人驅之北去拘置邠州洪皓留北與昉

時相聞左右二帝於五國城與劉化源俱以不屈死人物志

朱嗣孟字道鳴樂平人宣和進士為廣德司戶南渡初叛卒破鎮江遂犯廣德守倉皇遣使招安無敢當者嗣孟雅自負不復遜直詣賊壘為陳逆順禍福使自擇所處賊以為忤殺之事聞官其子公慶終開化宰同上

程克俊字元顓浮梁人宣和進士調湖州刑曹改太學錄召對論事許直擢翰林學士時大將怙恩邀寵制書所及多裁抑之淮瓦梁堰淤廢被命往視盡得故址順昌之捷金使來和當直草誓約金主嘆服鄱陽學宮經兵火權貴請於朝以為墓旨已可其奏克俊封還制書遷樞密院權參知政事以疾請祠卒謚章靖著有易通解諸書林志

程次山字際雲樂平人宣和入太學上書忤當軸安置光州
靖康元年冬潰軍趙立陷光州次山與吳翊合謀復之是
冬金人入汴次山隨河東經略傅亮併力勤王至濟州奉
迎高宗受冊移檄僞楚斥其僭義聲甚振車駕駐建康次
山與魏祐上書忤宰相繫獄帝察其忠詔府尹湯東野出
之人物志

胡涓字霖卿鄱陽人靖康進士丞遂昌縣以生民利弊為念
縣治距溪不數步而儒學切近其側每霖雨溪流漲溢則
堤湍齧害涓因訪舊龍圖張根所築堤址而修葺之身自
董役堤成百姓蒙其利同上

按胡涓林志豫章書俱不載

汪澈字明遠自新安徙居饒州浮梁第進士教授衡沅用薦
為祕書正字校書郎除監察御史進殿中侍御史時和戎
歲久邊防浸弛澈陳養民養兵自治豫備之說累數千言
左相湯思退不協人望澈同陳俊卿劾罷又論鎮江大將
劉寶十罪詔奪節予祠尋由御史中丞出為湖北京西宣
諭使時唐鄧陳蔡汝穎相次歸職方未幾金主亮死澈乞
出兵淮甸與荆襄軍夾擊其歸師未報而金新主罷兵請
和召澈入為參知政事與宰相陳康伯同贊內禪孝宗即
位銳意恢復首用張浚使江淮澈以參豫督軍荆襄將分
道進討緒略就隆興元年入奏還武昌而張浚尅期大舉
詔澈出師應之澈以議不合乞令浚併領荆襄諫議大夫
王大寶論澈無制勝策除資政殿學士提舉洞霄宮大寶
疏再上落職仍祠祿明年知建康府尋除樞密使在位二

年以觀文殿學士知鄂州兼安撫使孝宗訪邊事澈奏向者我有唐鄧為藩籬又皇甫侗控扼陳蔡敵不敢窺襄既失兩郡侗復內徙敵追新野相距百里爾臣令趙搏王宣築城儲糧分備要害有以待敵至於機會之來難以豫料孝宗善之時議廢江州軍澈言不可知寧國府改福建安撫使復請祠致仕卒年六十三贈金紫光祿大夫謚莊敏有文集二十卷奏議十二卷

宋史

洪适字景伯皓長子也皓使朔方适年甫十三能任家事以皓出使恩補修職郎紹興十二年與弟遵同中博學宏詞科高宗曰父在遠方子能自立此忠義報也遂除敕令所刪定官後三年弟邁亦中是選由是三洪文名滿天下改祕書省正字甫數月皓歸忤秦檜出知饒州适亦出為台

州通判垂滿皓謫英州适後論罷往來嶺南省侍者九載檜死皓還道卒服闋起知荆門軍改知徽州尋提舉江東路常平茶鹽首言役法不均之弊升尚書戶部郎中總領淮東軍馬錢糧孝宗即位海州解圍符離用兵饋餉繁夥适究心調度供億無闕遷司農少卿隆興二年召貳太常兼權直學士院上欲除諸將環衛官詔討論其制适具唐及本朝沿革十一條上之除中書舍人時江淮羽檄沓至書詔填委咨訪疇答率稱上旨自此有大用意金既尋盟首為賀生辰使得其要領以歸乾道元年五月遷翰林學士仍兼中書舍人秦埴久廢忽予祠适奏曰李林甫死後諸子皆流配嶺南秦檜稔惡自斃不肖之孫官職仍舊可謂幸矣宮觀雖小埴得之則人以為除用之漸恐檜黨牽

連而進其命遂寢六月簽書樞密院事上諭參政錢端禮
虞允文曰三省事與洪适商量東西府始同班奏事八月
拜叅知政事十二月拜尚書右僕射同中書門下平章事
兼樞密使未幾乞歸卒諡文惠 同上

洪遵字景巖皓仲子以父蔭補承務郎與兄适同賜進士出
身高宗以皓遠使擢為祕書省正字中興以來詞科中選
即入館自遵始皓南還與朝論異出守遵遂乞外通判常
婺越三州復入為正字八月兼權直學士院湯鵬舉副臺
端密薦為御史方賜對而父訃聞免喪召對極陳父冤曰
先臣與龔璿同出疆璿仕於劉豫以妄殺兵官為豫所誅
而秦檜贈以節旄擢用其子先臣拒金人之命留十五歲
乃得歸顧南竄嶺外臣兄弟屏跡在外檜不分忠逆如此

高宗悉為道謫語所起且曰卿再登三館嘗典書命今以
修注處卿遂拜起居舍人奏乞以經筵官除罷及封章進
對宴會錫予講讀問答等事萃為一書名之曰邇英記注
其後乾道間又有祥曦殿記注實自遵始遷起居郎兼權
樞密院都承旨舊制修注官經筵官許留身奏事而近例
無有遵奏請復舊制且言起居注未修者十五年請除見
修月進外每月帶修皆從之二十九年拜中書舍人時勲
臣子孫多躡居臺省遵極言侍從朝廷高選非如磨勘階
官安有遷序之制望收還前詔又言瑞昌興國之間茶商
失業聚為盜賊望揭榜開諭許其自新願充軍者填刺願
為農者放還上皆可其奏尋試吏部侍郎遷翰林學士兼
吏部尚書汪澈論湯思退罷相遵行制無貶詞澈以為言

遂丐去以徽猷閣直學士提舉太平興國宮三十一年完顏亮命蘇保衡由海道窺二浙朝廷以浙西副總管李寶德之命遵知平江寶以舟師擣膠西凡資糧器械舟楫皆遵供億寶成功而歸遵之助為多先是朝廷慮商舶為賊得悉拘入官既而不返並海縣團萃巨艦及募水手民兵皆繫留未得去遵因對論之以船還商而聽水手自便吳人德之孝宗即位拜同知樞密院事連章乞免乾道六年起知信州徙知建康提舉洞霄宮卒諡文安 同上

洪邁字景盧皓季子幼讀書日數千言一過目輒不忘從二兄試博學宏詞科邁獨被黜紹興十五年始中第授兩浙轉運司幹辦公事入為勅令所刪定官皓忤秦檜投閒檜憾未已遂出添差教授福州累遷吏部郎兼禮部除樞密

檢詳文字建議令民入粟贖罪以紓國用又請嚴法駕出入之儀吳璘病篤朝論欲徙吳珙代之邁曰吳氏以功握蜀兵三十年毋使尾大不掉知樞密院事葉義問出視師奏以邁叅議軍事至鎮江聞瓜州官軍與金人相持會建康走驛告急義問遽欲還邁力止之曰今退師無益京口勝敗之數而金陵聞返旆人心搖動不可遷左司員外郎三十二年春金主褒遣左監軍高忠建來告登位且議和邁為館伴使時議遣使報聘邁慨然請行書用敵國禮至燕金閣門見國書呼曰不如式抑令改陪臣二字邁執不可多方困辱卒遣還乾道六年除知贛州郡兵素驕小不如欲則跋扈郡歲遣千人戍九江是歲或怵以至則留不復返眾遂反戈民訛言相驚百姓恟懼邁不為動但遣一

西江志 卷八十七
校婉說之歸營徐詰什五長兩人械送潯陽斬於市尋知
婺州奏金華田多沙勢不受水五日不雨則旱凡爲公私
塘堰及湖總八百三十七所婺軍素無律春給衣欲以緡
易帛吏不可則羣呼嘯聚以計逮捕四十有八人置之理
黨衆相嗾閔擁邁轎邁曰彼罪人也汝等何預衆遂巡散
去戮首惡二人梟之市餘黥撻有差莫敢譁者特遷敷文
閣待制召對首論淮東邊備六要以提舉佑神觀兼侍講
同修國史預修四朝帝紀進敷文閣直學士拜翰林學士
上四朝史一祖八宗百七十八年爲一書淳熙改元進煥
章閣學士知紹興府明年再上章告老進龍圖閣學士尋
以端明殿學士致仕是歲卒年八十贈光祿大夫謚文敏
有容齋五筆尺堅志行於世其他著述尤多 同上

按林志容齋所著尚有野處集孝宗爲書序史傳失載
汪沆字濟遠浮梁人澈之兄也靖康間金兵入關結盟去沆
時爲太學生逆知敵必渝盟叩閤上書極論求才練兵爲
守備計不報明年敵人再至沆以書抵粘罕陳內外大義
用兵利害遂東歸遇李綱又投書有言不足慮實可慮者
四綱韙之竟以國恥未雪憤鬱而卒 林志

西江志卷第八十七

西江志卷第八十八

人物 二十三

饒州府 二

宋

程舟字濟川德興人紹興進士仕桂陽丞所著有雷溪文集
與兄侗皆以文學知名教授弟子 朱子全集

董琦字順之德興人年二十五始從韓溪程公受春秋學義
役法行首出田粟里人賴之為人精悍議論貴決白涉世
不偶更折節為儒生自力於善老年漸屏家務即所居旁
藝花果以自娛以子銖故授迪功郎 同上

李儼甫鄱陽人母疾籲天刲股疾亟鑿肝以進母疾頓蘇異
香滿室紹興間表之曰孝子李儼甫之門 林志

王剛中字時亨樂平人紹興十五年進士第二人任某州推官改左宣義郎故事當召試秦檜怒其不詣已授洪州教授檜死召見擢祕書省校書郎遷著作佐郎中書舍人言今日禦敵先務敵強則犯邊弱則請盟今勿計敵人之強弱必先自治擇將帥蒐戰士實邊儲備器械國勢富強將良士勇請盟則爲漢文帝犯邊則爲唐太宗上躓其言會西蜀謀帥上曰無以逾王剛中矣以龍圖閣待制知成都府置制四川時吳璘累官至大帥其下姚仲王彥等亦建節雄一方惟剛中檢身以法示人以禮不立崖塹馭吏恩威並行羽檄紛沓從容裁決皆中機會敵騎度大散關人情洶洶剛中跨一馬夜馳二百里起吳璘於帳中責之曰大將與國義關休戚臨敵安得高枕而卧璘大驚又以一

蠟丸書抵張正彥西師大集金兵敗走方議奏捷剛中倍道馳還謂其屬李燾曰將帥之功吾何有焉燾嘆曰身督戰而功成不居過人遠矣已乃差擇將士衆所推者上之朝備統帥選孝宗受禪以宮僚進左朝奉大夫召赴闕以足疾請祠提舉太平興國宮歸次番陽營圃植竹號竹塢金犯淮有旨趣剛中入見陳戰守之策除禮部尚書簽書樞密院進同知院事剛中曰戰守者實事和議者虛名不可恃虛名害實事又奏四事開屯田省浮費選將帥汰冗兵居政府屬疾卒年六十三贈光祿大夫謚恭簡繇布衣至公卿無他嗜好公退惟讀書著文爲樂有易說春秋通議仙源聖紀經史辨漢唐史要覽天人修應錄東溪集應齋筆錄凡百餘卷

宋史

羅鞏字伯固樂平人與王剛中少以文相雄同登進士宰安
福庭無淹訟強宗鉅室帖就繩墨用薦除宗正丞尋遷監
察御史奏對剴切上謂左右曰朕得羅鞏居六察真御史
也遷大理少卿明決果斷案下無冤民以疾畀祠 人物志
計衡字致平浮梁人紹興進士官徽州教授檢法監察御史
轉朝奉大夫得祠衡博洽強毅遊太學時上書言天下大
計者四留介使以款敵國之謀下詔書以感河北之士先
舉士以決進取之策用人望以激忠義之氣及入官每著
善政死之日家無餘貲吳草廬澄嘗稱為清白吏 林志
洪綸字德言樂平人擢第初尉咸寧尋令萬載察橫民為民
害者薙獮之境內以肅乾道間歲大歉綸不復白長直發
廩賑貸之部使者不以為罪更薦之朝命未下以憂去人

物志

夏穎達德興人甫冠舉於鄉補太學生靖康初金兵至上命
李綱與之決戰執政惑和議諷臺諫劾罷之穎達率同舍
生陳東劉銓等六十餘人伏闕上書復用綱時張浚開閩
江淮留幕下浚命其子栻受經術後奏補惠州文學遷鄂
州蒲圻縣丞改知吉州龍泉縣歲大饑郡守希轉運使意
不聽民訴災民遮穎達馬號泣以請詣府陳之不許因趨
出悉取民所訴狀屬吏按行阡陌先蠲其租自詣轉運使
得蠲恤屬邑效之移知清流縣數月以憂免 同上
趙善應字彥遠餘干人丞相汝愚之父官終修武郎江西兵
馬都監性純孝嘗刺血和藥以進母畏雷每聞雷則披衣
走其所母喪哭泣毀瘠終日俯首柩旁聞雷猶起側立垂

涕父終肺疾每膳不忍以肺為羞母生歲值卯謂卯鬼神也終其身不食兔聞四方水旱輒憂形於色江淮警報至同僚會宴善應悵然曰此寧樂飲時耶眾為失色而罷夏不火草冬不破壤懼百蟲之遊螫者失其所也晉陵尤表稱之曰古君子既卒丞相陳俊卿題其墓碣曰宋篤行君子趙公彥遠之墓

朱子集墓志

程宏圖字士尚浮梁人工詞翰負氣節紹興講和以來金使道經凡官私門額悉覆之以楮隆興間金使往天竺過太學門臨安尹命吏如例幕太學二字時宏圖直學欄幘立其下正色曰賢士之闕國家儲才地何歉於遠人拒之不聽幕使白尹上聞孝宗在東宮嘉歎之後即位宏圖登第喜曰朕聞其名久矣他日有用之佐也擢大理司直遷丞

卒

人物志

余童字端蒙樂平人紹興進士為吉水令擢知信陽軍因圖信陽山川以獻且奏三關為荆楚之蔽信陽又三關之蔽失信陽則三關不足恃當使三關信陽相為犄角上覽圖甚善擢知蘄州行歉歲荒政等戶為三甚貧者與賑濟無蓋藏者與賑糶有田可服饑不能耕者與賑貸民不知為凶年除江西提舉卒平生嗜書乃擬元準虛為極書

同上

余時言字知默上饒人徙居浮梁紹興進士授安豐軍教授歷仕內外臺府有能聲贊上親征隆興初知漢州值蜀大歉所部獨登出粟活流民二十餘萬終敷文閣待制

林志

鍾炤之字彥昭樂平人紹興進士尉善化令宿松教宜陽士民愛敬仕潭日受教南軒張栻為書淇澳一章期以學問

工到則人理明而本心立炤之服膺終身

人物志

朱伯雄字少陽浮梁人紹興進士歷桂陽教授吉水知縣潛心六經集漢唐以下諸儒羽翼六經之說各以類從附以已見學者翕然宗之以董仲舒春秋繁露義有未當別著

繁露十卷

同上

趙汝愚字子直漢王元佐七世孫居饒之餘于擢進士第一簽書寧國軍節度判官名試館職遷校書郎祕書少監兼權給事中言內侍陳元不宜使居總戎之任駁張說托言邊機不宜泄改密院文書經門下省舊制以集英殿修撰帥建福進置制四川兼知成都府諸羌蠻相挺為邊患汝愚至悉以計分其勢孝宗謂其有文武威風紹興二年召為吏部尚書上常以五日一朝孝宗于重華宮至是往往

以傳旨免汝愚往復規諫上意乃悟又屬嗣秀王伯圭調護于是兩宮之情始通除知樞密院事五年春孝宗崩上曰昃不出宰相率百官詣重華宮發喪留正汝愚議介少傅吳玘請憲聖太后垂簾暫主喪事憲聖不許汝愚以國本係乎嘉王乃入奏云皇子嘉王仁孝夙成宜早正儲位以安人心不報越六日再請御批付丞相云歷事歲久念欲退閒留正見之懼因朝臨佯仆於庭密為去計汝愚自度不能辭其責與徐誼葉適謀可以白意于慈福宮者乃遣韓侂胄以內禪之意請於憲聖遇重華宮提舉闕禮告之故因轉陳憲聖侂胄復命汝愚始以其事語陳睽余端翌日禫祭羣臣入憲聖垂簾汝愚率同列再拜奏皇帝疾未能執喪臣等乞立皇子嘉王為太子以繫人心皇帝批

出取太皇太后處分憲聖乃命皇子即位寧宗詣几筵殿
哭盡哀衰服出就重華殿東廡素幄立內侍扶掖乃坐百
官起居訖行禫祭汝愚特進右丞相力辭至再三不許而
侂胄自以有定策功且依託肺腑出入宮掖居中用事朱
熹進對以爲言內批除熹宮觀吏部侍郎彭龜年力陳侂
胄竊威福又奏近日逐熹太暴故欲陛下亦亟去此小
人旣而內批龜年與郡侂胄勢益張日夜謀擯汝愚視正
士如仇讎正言李沐奏汝愚同姓將不利社稷乞罷其政
遂罷相知福州國子祭酒李祥博士楊簡太府丞呂祖謙
皆上書訴汝愚之忠大學士楊宏中等伏闕上疏悉得罪
安置羈管去侂胄忌汝愚益深謂不重貶人言不已責寧
遠軍節度副使永州安置爲守臣錢鞏所窘暴薨天下聞

而免之侂胄誅盡復原官賜諡忠定所著詩文十五卷太
祖實錄舉要宋朝諸臣奏議三百卷

宋史

姜夔字堯章德興人學詩於蕭千巖琢句精工有詩云夜暗
歸雲繞枕牙江涵星影鴈團沙行人悵望蘇臺柳曾與吳
王掃落花楊誠齋喜誦之謂其嗣伯子曰吾與汝弗如堯
章也堯章號白石道人嘗請於朝欲正頌臺樂律以議不
合而罷紹興間秦檜當國遂隱居箬坑之丁山叅政張燾
累薦不起高宗賜宸翰建御書閣貯之以隱逸終

人物志

洪友成字士源樂平人宰興國邑旱以蠲賦八分請守拒不
聽友成納印徑去守慙貽書勉留入爲審計司遷大理寺
丞因奏對援師說俾縣令與丞尉同訊獄梁成大詆爲迂
闊友成不爲屈尋以親老丐郡得衡改瑞簡易爲政州人

便之同上

馬元益字孝昭樂平人少負韜略紹興末柄臣諱言兵張浚言和不足恃竄永州元益方督造戎器書乞乘敵未動先發制之大忤時相送桂陽編管已而敵謀果洩上追省前言大修戰備竟成辛巳之捷任至閣門宣贊同上

按以上二人林志不載

趙汝靚汝愚從弟餘干人潛心理學苦節不渝嘗作山東書院留朱熹講學後人祀熹於書院靚亦從祀同上

趙崇憲字履常汝愚長子淳熙八年對策第一越三年復以進士擢甲科汝愚既貶死崇憲闔門自處居數年復汝愚故官職多勸以仕改奉議郎知南昌縣事升籍田令崇憲拜命感泣陳疏力辭以為先臣之冤未悉昭白而其孤先

被寵光非公朝所以勸忠孝厲廉恥之意俄改監行在都進奏院復引陳瓘論司馬光呂公著復官事申言之乞以所陳下三省集議使先臣之讒謫既辨忠節自明而憲聖慈烈皇后擁護之功德益顯然後申飭史官改正誣史又請正趙師召妄貢封章之罪究蔡璉與大臣為讎之姦燬龔頤正續稽古錄之妄詔兩省史官考訂以聞從之未幾贈汝愚太師封沂國公擢崇憲軍器監丞改太府監丞遷祕書著作權考功郎請外知江州郡民歲苦和糴崇憲疏於朝永蠲之瑞昌民負茶引錢新舊累積困不能償死則以責其子孫猶弗貸會新券行視舊價幾倍蕞崇憲亟請以新券一償舊券二受賜者千餘家遷轉運判官以兵部郎中召尋改司封皆固辭出知靜江府宋史

按朱子集中答趙履常尺牘與論讀易之法其有志于學可知蓋宗室中之賢者史傳特詳於家國之際意其必有著述惜無可考

許錫字晉之樂平人淳熙進士令建昌守興國用真德秀薦除夔路運判部內諸郡不產鐵而官責鼓鑄奪民鍤鋤以充錫奏罷之尤留意鹽筴一洗宿弊經用外所餘常例皆貯公帑視前頓倍分十萬為下戶輸賦而盡籍其數以聞久之除刑部郎中投劄廟堂以語取忤乞祠除知漳州不赴請老歸

人物志

董燭字季興德興人受學沙隨程氏紹熙進士知瑞安改辰溪值歲饑行救荒策民賴以蘇寧宗褒之召見進所誤救荒活民書敕曰爾忠為報國誠在愛民自號南隱有南隱

集

林志

柴中行字與之餘干人紹熙進士授撫州軍事推官韓侂胄禁道學校文轉運司移檄令自言非偽學中行奮筆曰自幼讀程頤書以收科第如以為偽不願考校調江州學教授母喪免廣西轉運司辟為幹官嘉定初差主管尚書吏部架閣文字遷太學正升博士轉對首論主威奪而國勢輕次論士大夫寡廉隅乏骨鯁宜養天下剛毅果敢之氣末論權臣用事包苴成風今舊習猶在宜舉行先朝痛繩賊吏之法遷太常主簿出知光州嚴保伍精閱習增闢屯田城濠營砦器械糗糧治行為淮右最遷西京轉運使兼提點刑獄改知襄陽兼京西帥仍領漕事江陵戎司移屯襄州兵政久弛中行白於朝考覈軍實舊額二萬二千人

存者纔半亟招補虛籍自是朝廷以節制之權歸帥司由是入爲吏部郎官擢宗正少卿進祕閣修撰知贛州治盜有方境內清肅句祠得請以言罷理宗即位以右文殿修撰主管南京鴻慶宮卒所著有易繫集傳書集傳詩講義論語童蒙說 宋史

按人物志中行謚獻肅史傳失載

程端蒙字正思德興人朱子門人自名其齋曰求放心朱子爲之銘淳熙七年領鄉貢補太學生時禁洛學持書上諫議大夫王自然責其疏斥正學及對蘇程王氏策問主司意在陰詆朱子正思奮筆曰王氏以佛老之學蠹壞人心蘇氏有立朝大節不以變故死生動心此其天資超卓有非常人所可及者恨其學術未醇未免有戰國策士餘習

繼孔孟之傳排異端闢邪說道統所傳不歸之二程又其誰哉自知所對不合時好投筆徑去自是遂不復應舉所著有性理字訓毓蒙明訓學則等書既卒朱子爲墓表又稱其弟端臨端本子實之亦知爲學云 人物志

按朱子程正思墓表以爲鄱陽人與此異又按朱子程正思像贊云其容退然若不勝衣而自勝有以舉烏獲之任其言若不出諸口而衛道足以摧髡行之鋒稱許如此其學行可知矣

曹建字立之餘干人幼穎悟厲學一日得河南程氏書讀之慨然盡棄其所爲者而覃思於諸經聞張敬夫講道湖湘欲見之不能至有告以沙隨程氏學古行高者即往從之既又聞陸氏兄弟獨以心之所得者爲學則又往受其學

晚年登朱子之門論易之大畜何天之衢建曰何其天之通達也熹大器之故易傳本其義建家居事母孝待弟姪友愛死之日正冠危坐語其弟廷曰吾雖病甚而學益進此心瑩潔無復纖翳語訖而歿同上

按朱子集中曹立之墓表稱其學博而不雜約而不陋斯道之傳其庶幾乎史傳中顧不在朱子門人之列特表出之

劉泌字伯正餘干人嘉泰進士歷官郡縣臺省院部以母老乞養嘗為母祈壽甘露三降庭梅林志

劉伯正字直卿餘干人開禧進士積官監察御史有事於明堂雷電忽至執事者鮮不離次伯正立殿下紳笏儼然帝遂以大任期之拜叅知政事卒贈少保時論謂其立朝以

靜重鎮浮不求名譽云同上

鄒孟卿字醇甫餘干人開禧進士知豐城會興元軍士張福莫簡亂殺制置聶子述總領楊尤鼎陷閬州果州廷議孟卿有文武材授行軍叅議與賊戰敗之簡自殺福請降陞四川制置兼茶馬使敵不敢犯邊後被譖賜死事白詔復其官諡忠襄同上

洪邦直字應賢樂平人登第授婺源縣尉秩滿陞知縣事時饑大舉荒政民賴以活當路交薦特旨賜對除御史在婺源嘗以猛得怨既入察舊隸有誣之朝者上雅知邦直流誣者嶺表邦直懷不自安因丐去上察其廉貧進官兩秩賜白金縣令增秩贈金自邦直始人物志

趙必愿字立夫崇憲子以大父汝愚蔭調常熟丞嘉定七年

西江志 卷八十八
舉進士歷知處泉台婺四州遷太府寺丞度支郎中改宗
正少卿進太府卿權吏部右侍郎時邊事亟必愿請勅彭
大雅以復夔責歸峽二守以自効伐順流之謀折擣虛之
鋒備江陵之境守沅江益陽江以防衝突盡收江上民船
無資敵用區畫皆中事機改戶部尚書因迂丞相史嵩之
屢乞祠不許卒 同上

甯時鳳字祥夫浮梁人登第官蘄州嘉定辛巳金兵圍蘄守
李誠之云誰能共守諸僚佐不應獨時鳳曰見危授命臣
子大節臨難而免吾不忍為卒死之 林志

張文之字子經樂平人通判濠州金兵至守孔福謀夜逸文
之曰果爾輕動奈一城何自提兵出登橫澗山與敵相持
十餘日經二十餘戰無外援力不能支被執送燕山欲授

以官義不屈囚之土窟曰吾世受宋恩其忍負國金人重
之後王抃來議和見文之苦狀為請於金帥得一家書附
抃還奏 同上

金從龍字誠之浮梁人嘉定進士知涪州樂温時金兵犯蜀
潰將王全者擁兵入境從龍任供餉留戍守邑賴以全魏
了翁西歸見樂温歸然獨存大加稱賞改知瀘州納溪兼
通判未幾寇大至力不能支竟死事聞賜贈蔭 同上

王趙字國瑞樂平人嘉定進士授光州固始簿有經略善撫
綏明年金人圍光州趙解之改固始令厲兵完城紹定四
年金兵犯淮守令望風遁趙舉輕騎襲金營出其不意得
輜重以還金怒奮兵圍固始城濠深浚敵不能入相守三
月無援趙度勢不可支乃屬固始民曰我不忍若等流離

顧事勢不可為遂懷印赴漆井死諡勇節 人物志

史寅仲餘干人嘉定間以詩經登第仕至朝散郎知化州洞

蠻負固督軍出捕沒于陣贈朝散大夫蔭其子 林志

鍾宏字子虛樂平人從邑宰楊簡游見器重嘉定進士主建

德簿再任貴溪丞著惠政同門袁甫表諸朝稱其學有淵

源實得故閣學楊簡之傳由兩浙漕屬入為太學錄供職

甫一月謁告省親累擢皆不起 人物志

按宏所著有論語說約了齋綴集

李遇龍字叔興浮梁人紹定進士歷官樞密都丞旨刑部侍

郎集英殿修撰諡忠定改忠靖遇龍重厚深沉恒以國事

為憂立朝規箴言必剴切在外輕徭薄征以紓民力繕城

謹燧以固邊防募民粟廣屯種以足軍餉興學校精簡拔

以起士類且矢死報國克復全蜀捷上聞有一念精誠堅

忠定力之褒 林志

彭大雅字子文鄱陽人進士官朝請郎出為四川制置副使

甚有威名嘉熙四年使北淳祐三年守重慶時蜀地殘破

大雅披荆棘冒矢石築重慶城以禦利閭蔽夔峽為蜀根

柢人德之為立廟卒諡忠烈孫克紹博學能詩有學餘藁

豫章書

按彭大雅集中有致仕得請七律二章非卒官重慶者

又按大雅于嘉熙淳祐中已入官矣鄱陽縣志以為寶

祐進士者訛

史本鄱陽人性至孝父沒廬墓悲號有芝草之瑞舉進士試

易經寧宗閱卷以為江南真秀才歷任至奉直大夫居官

廉潔時稱孝廉

林志

李伯玉字純甫餘干人端平二年進士第二授觀察推官召試館職歷詆貴戚大臣直聲暴起改校書郎奏言臺評迎合上意論罷尤焞楊棟盧鉞三人忠衰不辨乞同罷帝不允差知南康軍遷著作郎帝怒降兩官罷叙復知邵武軍彈臺臣蕭泰來遷著作郎帝怒降兩官罷叙復知邵武軍改湖北提點刑獄移福建度宗即位兼侍講權禮部侍郎兼同修國史實錄院同修撰賈似道嘗集百官議事忽厲聲曰諸君非似道拔擢安得至此衆默然莫敢應者伯玉答曰伯玉殿試第二名平章不拔擢伯玉地步亦可以至此似道雖改容而有怒色既退即治歸以顯文閣待制知龍興府右正言萬石論罷召入覲擢權禮部尚書兼侍讀

似道益專國柄帝以伯玉舊學進之卧内相對泣下欲用以叅大政似道益忌之尋病卒伯玉嘗請罷童子科以爲非所以成人材厚風俗趙汝騰嘗薦八士各有品目於伯玉曰銅山鐵壁立朝風節大較似之所著有斛峰集

宋史

馬廷鸞字翔仲樂平人淳祐進士調池州教授召試館職時外戚謝堂厲文翁內侍盧允升董宋臣用事廷鸞試策言彊君德重相權收直臣防近習大與時迂遷祕書省正字四年尤焞提舉史事辟爲史館校勘遷校書郎兼權樞密院編修官時賈似道自江上還位望赫奕廷鸞未嘗親之遷樞密院編修官擢起居舍人進中書舍人遷禮部侍郎理宗遺詔度宗登極詔皆廷鸞所草兼侍讀辭不許疏列孝宗之政以告升直學士院咸淳元年進端明殿學士簽

書樞密院事兼權叅知政事同知樞密院事進右丞相及
辭位帝惻怛久之曰丞相勉爲朕留廷鸞言臣死亡無日
恐不得再見君父然國事方殷疆圉孔棘天下安危人主
不知國家利害羣臣不知軍前勝負列闔不知陛下與元
老大臣惟懷永圖臣死且瞑目頓首涕泣而退自罷相歸
又十七年而薨 同上

按豫章書載廷鸞所著有六經集傳語孟會編楚詞補
記洙泗裔編讀莊筆記皇極觀物外篇諸書

朱貔孫字興甫浮梁人淳祐進士丁大全在臺勢焰熏灼天
久陰雨貔孫貽書政府言回積陰之道去姦邪罷手實蠲
米稅姦邪指大全也丞相董槐得書嘉歎主管尚書工部
架閣文字宦者董宋臣寵幸用事貔孫發策試胄子極論

宦寺專權之患宋臣諷言者論之謁告歸省遷太學博士
屬帝親擢監察御史兼崇殿說書在講筵言及宋臣撓政
事忤旨遷大理少卿又遷司農少卿兼太子右諭德詔許
乘馬赴講貔孫諭導得體太子每爲之改容兼國史院編
修官實錄院檢討官兼權直舍人院時大禮成封命叢委
吏持詞頭下每夕無慮數十貔孫運筆如飛夜未中已就
皆溫潤典雅遷宗正少卿丁母憂服除授祕書監兼太子
左諭德擢殿中侍御史所論皆當世急務宋臣覆出朝論
紛然貔孫因對力斥其姦長星出東方貔孫力議外戚內
臣及進奉羨餘失人心者且曰回天心自回人心始辭旨
懇切帝爲之感動度宗即位擢右諫議大夫以疾乞辭言
職遷吏部尚書不拜帝以舊學故雅欲留貔孫使者旁午

於道而貌孫辭益力以華文閣學士知寧國府似道諷言者論罷久之提舉太平興國宮復華文閣學士知袁州移福建安撫使未行卒於袁之郡治有文集奏議行世 同上

董銖字叔仲德興人登進士授金華尉游朱子之門來學者晦翁必命銖與辨難然後折衷所著有性理注解易註卒

黃勉齋志其墓 林志

鍾季玉樂平人淳祐進士調為都大坑冶屬改知萬載縣淮東制置使李庭芝薦之遷審計院改宗正寺簿又遷樞密院編修出知建昌軍會有旨江西和糴季玉至郡才半年屬歲旱請於朝和糴得減三之一遷提舉常平未幾改江西轉運判官郡大胥以賄敗前使百計護之季玉卒窮治投嶺表俄以祕書丞召還遭前使構讒而封駁之改都大

提點坑冶北兵渡江季玉徙寓建陽兵至不屈死之 宋史

陳學心安仁人淳祐進士官至高州知府謝枋得起兵復安仁命學心守之元兵至戰死 人物志

朱宏字元禮浮梁人幼厭程式之習精研義理身體力行朱熹嘗稱之曰高識篤行鮮與倫比為銘其堂曰克已作回瀾集以斥佛氏述古冠婚喪祭之儀名曰禮編 同上

金去偽字敬直浮梁人一舉於鄉即棄而從朱熹遊潛心體驗學者稱曰草窓先生或勸之著書曰經經也史緯也諸儒之訓釋晦菴折衷之集其大成矣卒不著書授鍾離主簿不就 同上

董為良字景房德興人少學徐誠叟之門以文行聞於州再試禮部不第退而講學不復以榮達為事嘗作活國書一

編識者躋之 朱子集

張顯字立道德興人與董盤澗程端蒙爲友遡程朱之學登進士授武義尉酒醋監理宗詔舉孝廉建康留守馬光祖以顯應持遷史館進三朝實錄穆陵玉牒經武要略等書

林志

按顯所著尚有雙澗文集

程珙字仲璧德興人師事晦翁親授玉山講義所著有易說及九疇策疏 人物志

按朱子集中有答程生珙尺牘

舒大邦字伯興德興人寶祐進士時賈似道專政凡除授必以賂大邦恥之不願仕又禁於制不得歸後遇東宮赦始獲歸省遂集族黨子弟訓之館於鄭師樓適同年劉子秀

過訪語以敵兵下諸郡邑江南危在旦夕大邦遂奮激舉義不逾月而遠近響應得數千人即部勒詣御前都統程大元部下期年滅南寇屢遷朝官光祿唱名賜宴上聞唱名舒大邦即召御座前謂曰朕萬幾賴卿等苟安大邦何以輸爲即御筆於鴻臚劄上更名文英 同上

江介字邦直德興人少穎悟習制科業一日因讀程子書至水清性善之說恍若有悟乃喟然太息曰吾平生所學不過爲利祿計耳是奚足爲遂棄舊學走衢州謁徐誠叟講業其門居數年方歸登進士授興國司戶叅軍郡以廉吏薦調隆興府進賢令將行會天旱饑極陳救弊之策民賴全活旣而旁邑官吏多以救饑受賞或喻介盍自言介曰子饑而母乳之爲賞乎會詔蠲民田租之半介白部使者

自全戶三升以下悉蠲之貧民被實惠又籍逃田收其租
 為繫囚飲食醫藥之費轉四川總領司主管時東川大饑
 介請得庫之美錢往賑之民爭繪像立祠秩滿調恭州通
 判介自奉省約而周贍族姻甚厚文不務雕刻詞氣卓犖
 曲盡事理 朱子集

鄒近仁字季友樂平人為龍陽丞嘗叩道於楊簡一再語而
 頓覺性至孝或干以利介焉弗受人告之過歛衽以服所
 當為雖強禦不畏著有歸軒集 林志

鄒夢遇字元祥樂平人以詞賦薦於鄉為人孝弟喜愠不形
 處事一於義從邑宰楊簡遊簡謂自孔子沒學者陷溺於
 文辭議論喪本靈而事意見寥寥千載自知自信者少若
 夢遇者庶幾同邑有舒益字裕父洪簡字子裴以蔭補官

知茶陵縣曹正字性之官永明尉學有自得寂靜弗忘酬
 應非擾方溥字成太誠確正直吳塤字仲和馬樸字季文
 以經學薦授廣昌主簿子燮字敬叔猶子應之字定翁王
 琦字表文以文薦補學官余元發字永之以詞賦薦王晉
 老字子康以蔭入仕篤志於道皆簡門人 同上

洪芹僕射适之曾孫以大父澤入官甫更調登進士第為欽
 州教授部使者先後薦之入遷太學博士擢國博出通判
 南劍累遷將作少監權直秘書升直學士院中書舍人屬
 兵興帝悟柄任非人自貽國禍詔書所至聞者奮激蓋芹
 所草也丁大全罷相出典鄉郡芹繳奏大全鬼蜮之資穿
 窬之行乞從諫臣所請追官遠竄以伸國法慷慨敢言天
 下義之帝方銳意向用而以論去退寓永嘉怡然自適卒

有文集 宋史

李致遠字彥煥樂平人用薦補授瀏陽司征七更部授三典
臬事推見情實吏不得欺時同邑有向友况宰歙邑邑有
夜斃人於道而兇弗獲里胥懼失捕遽指某氏曰是嘗停
死者顧置不問乎有司聽其言將以子證父定其罪友况
喟曰父殺之子證之人情大不美且子方在幼安能勝箠
楚哉歙守亦疑其枉委友况覆出之踰年一惡少以斂攘
敗及就鞫乃前日脫網之兇也一郡駭服 人物志

湯漢字伯紀安仁人真德秀在潭致漢為賓客江東提刑趙
汝談薦漢於朝詔免解差充象山書院山長淳祐十二年
充史館校書改國史寶錄院校勘會大水上封事曰君心
敬肆之分實上天喜怒之由一念之敬上帝臨汝祥風慶

雲所從出也一念之肆上帝震怒妖祲陰沴所從生也火
災應詔復上封事言陛下之所以未能任大守重而至於
召怨宿禍者始於立心之未公成於持心之不敬私心為
主而肆以行之此所以感動天地而水火之災捷出於數
月之內也陛下得不亟為治亂持危之計而可復以常日
玩易之心處之乎授太學博士召試館職遷秘書省校書
郎升秘書郎提舉福建常平召為禮部郎官歷知隆興府
入為玉牒所檢討官遷太府少卿改秘書少監度宗即位
授太常少卿遷起居郎兼權中書舍人權兵部侍郎久之
以端明殿學士致仕卒年七十一特贈正奉大夫謚文清
有文集六十卷 宋史

按漢湯所著名東澗集又有陶詩注若干卷

西江志 卷八十八
饒魯字伯輿餘干人從黃幹學幹問論語首篇時習是如何
用功魯曰當兼二義繹之思慮熟之踐履幹大器之嘗以
易赴棘試不遇遂歸專意聖賢之學以致知力行為本中
書舍人趙汝騰御史董槐左司諫湯中提刑蔡抗等皆相
為引薦召不起時理學大明師儒攸屬四方聘講無虛日
作朋來館以居學者又作石洞書院前有兩峰因號雙峰
門人私謚曰文元 人物志

齊興隆字昕翁德興人景定進士官蒲圻令值元兵下江南
興隆義不食粟佩印綬以歸曰全吾印以還吾君全吾身
以還吾親遂溺死 同上

胡允字玉叟樂平人景定五年鄉薦已而棄進士業專務義
理之學所著有潛齋文集十卷 同上

詹載采字可厚樂平人咸淳進士授無為軍僉判北騎出沒
蹂淮兵連禍結取需日酷民不聊生載采告守發義庾賑
之尋命兼屯田司事役軍民疏湮墾塞築堤扞江疏斗門
以走潦水又募民鑿陂塘以備旱淮人耕且安堵始教民
士以學從令者免其賦役之半迺而復者賦役俱免政譽
大著載采素友厚丞相葉夢鼎時與賈似道不合去國慮
黨禍連及遂引年歸 同上

陳牽字肇方安仁人父詩川以武功補沐陽令咸淳元年父
子同舉進士調滁州司戶叅軍父喪免改荆閩糧料院又
以母憂去調朐山主簿德祐元年繇海道歸杭授南安軍
教授不就牽少與謝枋得遊會枋得起兵安仁首拔入幕
執安仁令李景景牽里人也景請得以家貲二萬贖罪牽

西江志 卷八十八
曰普天之下莫非王土家財獨非朝廷錢耶聲其罪斬之
景子率鄉民五千報怨牽度勢不敵引兵趨信州就攝郡
事益王即位牽入覲遷宗正寺簿太府寺丞領江東安撫
使出上饒接應郡縣所部才千餘人屯火燒山越數月戰
潰被執至豫章元帥憐其才羈縻館留之遁去後三年復
起兵尋敗入積煙山中自刎死所著有鶴心集弟年同時
被執死焉 宋史

趙良淳字景程丞相汝愚曾孫累世以學行名號賢宗子良
淳少學於其鄉先生饒魯知立身大節及仕所至以幹治
稱而未嘗干人薦舉爲冗官二十餘年考舉及格改知分
寧縣秩滿特差權江西安撫司機宜文字詔除諸司審計
院督餉江西咸淳末廷臣議衆建宗室於內郡以爲屏翰

遂以良淳知安吉州尋以徐道隆爲浙西提刑以輔良淳
已而范文虎遣使持書招降良淳焚書斬其使元兵迫獨
松關有旨趣道隆入衛道隆旣去元兵至軍其東西門良
淳率衆城守夜就茭舍陴上不歸先是朝廷遣將吳國定
援宜興宜興已危不敢往乃如安吉見良淳良淳見國定
慷慨大言意其可用也請於朝留戍安吉已而國定開南
門納外兵兵入城呼曰衆散元帥不殺汝於是衆號泣散
去良淳歸府命家人出避乃閉閣自經有兵士解救之復
蘇衆羅拜泣曰侍郎何自苦逃之猶可求生良淳叱曰我
豈逃生者耶衆猶環守不去良淳大呼曰爾輩欲爲亂耶
衆涕泣出復投繯而死 同上

周堂字良載鄱陽人咸淳進士署江東提刑幹辦時江淮屢

警屋繕城堡豐儲峙爲捍禦計德祐乙亥元兵圍饒屋奉
母入保郡城母卒旣殯而城危丞相江萬里守臣唐震死
之元將諭衆能以城降者除郡守衆推屋署降表屋泣辭
夜遁南土平當路交薦起南劍治中同知廣州總管皆不
拜結廬母墓下杜門隱居削迹城市後以孫伯琦貴累封
番陽郡侯屋明經博學倜儻尚氣節世以魯仲連擬之稱
曰梅山先生二子應奎應極 豫章書
程時登字登庸樂平人自少慕義理之學聞董銖得朱子之
傳而鄉鄰程古山學於盤澗者因往師之搜探幽微會博
於約咸淳甲戌寇擾中原朝廷不廢科舉舊制合江東九
路士試之時登哀然首舉明年登太學又明年而宋鼎移
矣歸杜門謝游客四方請益之士嘗輻輳盈席一時名流

多出其門元訪遺才每物色之輒謝去 人物志

吳中字中行樂平人早慕伊洛之學聞雙峰饒魯得考亭朱
子正緒從之遊體認精詳季世隱而不仕名籍籍當世部
使者稅駕其門因質曰論語言心凡幾等中應聲曰簡在
帝心天地之心也從心所欲不踰矩聖人之心也其心三
月不違仁亞聖大賢之心也飽食終日無所用心衆人之
心也使者愕然歎服 同上

馬端臨字貴與樂平人丞相廷鸞仲子以郊祀恩補承事郎
明年漕試第一而丞相與賈似道不合去國遂侍疾不復
與計偕宋亡元召用宋丞相留夢炎爲吏部尚書與廷鸞
在宋爲同朝使求端臨出身文書以親疾力辭之侍疾不
脫冠帶奉湯藥丞相薨稍起爲學官歷慈湖書院柯山書

院山長教授台州路學三月引年歸老著有文獻通考

上

按馬端臨所著尚有大學集傳多識錄等書

夏椅字景實德興人補太學生會朝廷起復史嵩之率同舍生上書爭之不報登進士授安慶教授遷知鉛山書視民如傷四字於座右歲饑救荒有奇政既解去謝疊山作清廉引以紀其蹟遷安慶通判元兵至郡守范文虎降椅思勢不能支遂飲藥死

同上

章如旦字希周餘干人咸淳進士起家東陽主簿至撫州僉判元兵圍襄陽得江萬里書言呂文煥降泣不食三日與安仁陳陽見提刑謝枋得會枋得與張練帥議勤王帥大喜因與至弋陽入朱神廟卜如旦曰今國家大勢如此又

何疑哉為臣子盡忠孝而已枋得顧陽曰壯哉章希周也德祐中元兵圍饒州枋得集兵安仁如旦起兵迎之既而饒州降餘干亦降元兵攻安仁至團湖張孝忠戰死如旦敗走尋死之

同上

周樸字吉甫鄱陽人初從學於張采奇其才處之家塾樸以其知已事之不去時盜起江湖間州將以采知兵使督州兵討之盜有張家僮率眾掠邑里采將攻之而賊先發遂遇害樸走告州將誓欲為張復雠州將義之授以兵兵寡議者勸更募之樸曰我募而眾彼亦眾矣不若出不意急擊之即擣賊所屯賊窮以金擲地兵爭取金賊脫去立斬數人以狗慷慨流涕誓不與賊俱生眾感動願效死力攻一寨破之餘寨皆走乘勝追擊斬首數千生擒僮斬之俎

其心肺爲文祭其師境內賊寨數十悉平之元兵至州將
唐震死之衆勸吉甫降太守可得吉甫曰吾爲師復讎而
已他豈所望哉即日散遣所部隱居不復言功名

同上

熊彥詩字叔雅安仁人潛心力學文鳴一時學者稱曲肱先
生登進士累官至銀青光祿大夫後邑人翰林待制倪鏜
奏立錦江書院以彥詩配享朱熹於東序

林志

高祥字夢麟餘干人讀書悉諸經籍義理制度多發先儒所
未發登咸淳進士除忠定書院山長從遊者衆築齋舍上
方坪所著詩文三十卷

人物志

呂雲伸原名天孫鄱陽人咸淳間入太學爲文不逐時好以
行誼著聞後拜國子學諭嘗語人曰文由道而著如穀粟
布帛人間不可無者又曰文要易而難不可難而易也識

者稱之同上

趙介如字元道浮梁人從江丞相萬里遊其學靜深有本登
寶祐進士通判饒州提舉公田後元起爲雙溪書院山長
教有師法遠近從者甚衆

同上

余大昕字仲昭德興人性至孝以詩名程迥稱其恬淡古雅
不下邵康節晚年以孝廉舉任潭州知錄著有宜安集

林志

董鼎字季亨德興人自幼力學受業於勉齋黃幹得其端緒
嘗著書傳纂疏行世同邑余芑舒亦潛心程朱之學著有
書傳解等集

明一統志

張宏字子廣鄱陽人性鯁直恬淡從鄉先生柴益之學明經
飭行及禁伊洛之學歎曰吾道窮矣乃歸隱少與柴與之

友與之貴以提刑出守訪宏宏拒其騶從不納與之退攜
一童往謁淹住劇談君子謂宏之高古與之之悔過激勵
頽風斯可尚矣

林志

元

黃常字仲綱樂平人登進士任江州錄事改判梧州假禮部
侍郎使安南至承天門迎官請下馬常曰奉詔遠來當以
禮進安得屈天子詔使乎馳馬入承天門王長揖受詔常
曰天朝以世子十年不入貢未欲加兵者以世子為禮義
之國乃下此詔亦漢吳王不朝賜几杖之意受詔不拜得
無愧乎王亟拜稱謝使還朝論高之後遷江西行省叅知
政事

人物志

葉衡字仲興德興人任興化縣尹秩滿而去民立碑頌之有

民苦賦斂侯為優助民苦盜賊侯為戢捕治其吞併仁讓
以興治其虛誕訟獄以清等語蓋非虛譽云

同上

傅立字權甫德興人刻意學問有文名得里人祝泌皇極數
學歷官奉政大夫致仕卒謚文懿立出入禁闥二十餘年
眷遇加隆嘗建初菴書院以惠後學

林志

李思衍字克昌餘干人丞相伯顏渡江遣武良弼下饒以思
衍權樂平尋授袁州治中入為國子司業世祖以安南未
附屢遣將攻之不克召拜禮部侍郎副叅議禿盧奉使招
諭及至思衍曰大國之臣不拜小國之君禮也王笑曰敬
其主以及其使亦禮也遂抗禮思衍宣諭威德辭語簡切
王大敬之明日奉表款附驢使其甚厚時禿盧受思衍不受
既還上勞慰問所驢怒禿盧受思衍曰禿盧受安小國之

西江志 卷八十八
心臣不受全大國之體上賢之同上

按思行所著有兩山詩集

徐明善鄱陽人至元間任江西儒學提舉嘗奉使安南歷聘江浙湖廣三省考試拔黃縉卿於落卷中別號方谷人物志

周應極字南翁鄱陽人弱冠邃經史授婺源學正棄官歸養及喪免以姚穉王約劉敏中程鉅夫薦召見獻皇元頌擢翰林待制調集賢司直出同知池州事無留滯覈賦金之羨者還民著爲例英宗踐祚以舊臣召見勞問呼學士不名未幾卒兄應奎字明翁任饒州路治中饒穀宜私而輸以杭須轉糴他境應奎謂任土作貢屢請於行省得以私輸民便之林志

李楫字濟川鄱陽人大德間自袁州路經歷遷臨江新淦州判官時朝命使者巡行郡國至臨江官吏皆受譴責獨稱楫善遂遣楫往安福永新糾出吏贓萬計任淦六年長於聽斷每得隱情委讞鄰州縣款獄多所平反人稱明允終

江西行省照磨人物志

屈殷字子申鄱陽人以集賢待制李槃薦策試優等特除祕書丞乞便養改信州知事才明決信守王直號良吏事每咨於殷御史撒里不花張士弘考信羣吏嘉殷清苦交薦其賢同上

計初字遂初浮梁人授寧都州同知覈板冊以定賦出冤獄以正刑上下推服謁假歸省饑民起爲亂當道檄初往諭盜遂息擒首惡三人抵以法州久無雪民苦瘴癘復任時

西江志 卷八十八
大雪明年早一禱輒雨民歌曰去年雪今年雨微計侯那
得此 同上

朱公遷字克升樂平人至正初徵至京師授翰林直學士院
勸帝親賢遠佞修德卹民諸事當國者惡其切直章七上
出為金華學正於經傳百家之書禮樂律曆制度文物之
數無不通貫悉究用力於聖賢之道從學者常數百人學
士黃潛一見特加敬愛稱其道德文章卓然名世所著見
言行志大全性理諸書并著有詩經疏義 林志

韓光甫字炎鳳餘干人大德間薦為怯薛未幾授承務郎杭
州路總管判官剖決疑獄築西湖堤以捍水田遷汀州路
同知循州知府 人物志

齊大同字周卿樂平人皇慶初議頒朔安南特遣往國王設

宴明霞閣酒酣索詩授筆立成安南主臣敬嘆使還授龜

盈州同知稱疾南還 同上

吳存字仲退鄱陽人自少力學有卓識部使者勸以仕不答
延祐元年設科取士牒上無存名總管史烜曰不可無吳
先生強起之果中選授本路學正任不及代歸調寧國路
學教授未久引年去任七年聘主本省鄉試至元五年卒
於家所著有程朱易傳本義折衷月灣詩集 林志

胡至仁餘干人延祐進士學有淵源與饒雙峰游博洽淹貫
踐履純篤判樂平州致仕教授生徒臨川李實上饒王觀
進賢胡棣皆其門人世稱為弋溪先生 人物志

李存字明遠安仁人延祐初一試不第遂杜門著書秘書李
孝光舉以自代不果用葺書室曰俟齋人稱鄱陽先生有

西江志 卷八十八
修齋集三十卷危太樸為撰墓志

同上

按世所傳危太樸文集無李明遠墓志知非足本也

程淳字以正號竹洞德興人尊已先生實之之子與父同經互占魁亞登淳祐進士求近地以便養主徽州婺源簿去家纔三十里攝縣事廉勤和易仕終泉司檢察歸老於鄉所著有澹津記問龜峰稿竹洞稿

府志

高驥字馴良餘干人天性敏異學問該博延祐西省堂試授瑞昌儒學教諭既而以易舉進士不仕日與弟寄興詩酒有詩文若干卷臨川虞集金華黃縉為之序

人物志

吳正道餘干人明六經許慎說文有不足者補之臨川吳澄嘗問曰楷模二字假借乎曰取義也淮南子草木譜云模木生周公塚其色正楷木生孔子塚其葉直若正與直可

為法則況在聖人之塚乎澄大敬之有六書原六書通正

六書淵源圖澄為之序

同上

吳廷字仲迂浮梁人天資絕人力探理窟一舉於鄉不合不復屑意於詞章訓詁饒魯稱其立志堅確踐履篤實學者宗之號曰可堂先生後避兵隱橫塘山猶講道不廢使者表所居巷曰逸民所著有四書語錄五經發明先儒法言粹言重定綱目諸書

同上

湯自願字伯恭餘干人至正間蘄黃項普壽陷饒州所至殺掠慘酷自願起兵未幾州陷挾諸弟姪走港西習泰鄉率章黼黃士龍等結連臨川諸義士相為保陣其弟姪皆有膂力每戰必捷聲大振時號湯軍九月集兵復州治三日戰敗自願遭擒送饒州普壽欲其降不屈死

同上

西江志 卷八十八
李棠卿樂平人任無錫倉使張士誠入無錫棠卿遣人懷印
間道納之行省尋被執棠卿顏色自若士誠曰殺之成其
名乃囚繫倉所發憤卒 林志

朱公選字克用樂平人事元順帝累官憲副明兵至元主集
三宮議避兵北行趙伯顏不花慟哭諫曰天下者世祖之
天下陛下當以死守奈何棄之不聽夜半開門北奔公選
亦以疏留弗獲遂自刃 人物志

汪伯正字以德樂平人少通春秋大義尚節氣至正戊子冬
方谷珍聚衆海上伯正謁轅門備陳禦賊方略充參謀軍
事督攝海上左翼部伍與賊對壘大小七戰谷珍敗北錄
功授婺源州判官壬辰徐壽輝遣僞將項普壽略陷饒信
新安詔伯正拒之五月紅巾周伯顏來陷饒徽伯正引兵

自五嶺與平章三旦入合平南兵爲之平南兵多北人不
便險阻爲紅巾所邀三旦入僅以身免賊乘勝長驅入州
伯正力戰死 同上

李士會字有元樂平人少慧敏力學汎極古今子史百家而
歸宿於六經文軌先秦兩漢以樂平起漢建安迄宋德祐
上下千載無紀事者由是專意邑乘聞前輩有能道邑中
前事不憚百里往咨之楊簡曹彥約俱嘗尹是邑遺愛在
民心則走江浙訪及子孫盡得其當時施設政教之實風
鈔雪纂成樂平廣記三十卷邑人物始有據待制李燦稱
其紀述備考覈精筆削嚴可方古史云 同上

劉明字袞明鄱陽人蘄兵寇饒明糾集鄉民以義勇相保守
官軍東來明爲鄉導克復郡邑運糧開道遇賊力戰錄功

授浮梁州判從征信陽病亟諭左右曰所恨者殘寇未滅不能盡忠於國耳言訖而逝同上

夏璿字希政德興人至正間官湖廣行省都事兵至被擒不

屈死之明興以孫元吉貴贈少師戶部尚書林志

倪鏜字仲瑤安仁人博學宏才應文學選任南康路教授遷

翰林待制再遷晉寧知州有惠政奏立錦江書院以淑鄉

之後學同上

徐杰字杰之浮梁人幼以穎悟稱長益肆學問薦授象山書

院山長學士盧摯稱之曰南州高士舉充江西儒學提舉

中書左丞善狗薦其才授詹事院賓客說書同上

徐嘉言字尚友德興人幼明敏嗜學尤長於春秋與兄芳谷

齊名時稱二徐仕婺州學改饒州路教授未幾解冠去所

著有春秋原旨三傳辨疑史隱集人物志

程琰字伯圭德興人父龍斗宋咸淳進士官上饒主簿因先

塋在邑之蛟塘自署曰蛟塘子讀書務臻實踐與胡雲峰

鄒季友徐廷玉往還講習著有易經注義書經注義豫章

書

屈任字濟民鄱陽人元末紅巾倡亂任與弟直中暨同里操

宗義輩糾集鄉民保障寇至挺身抗鋒鏑力屈被擒賊帥

迫之從任曰棄母之養從汝強賊天地神祇所不容賊帥

曰義士也釋之人物志

葉蘭字楚庭鄱陽人任太常寺禮儀院奉禮明太祖初立周

伯琦應召以其名薦蘭曰吾世為元臣義不可仕弗就赴

河石橋水以死同上

胡振祖字振卿鄱陽人至正壬辰兵起倡義禦之迎平章三
旦八元帥韓彥邦軍為嚮導遂復饒以功轉倅本路踰年
斬兵復至力戰被擒誘以降振祖曰吾為國以義保民身
可死膝不可屈因給寇置酒連酌至微酣奪戟刺殺數人
而死 豫章書

丘省字公省餘干人至正間淮兵入境父被擒省以木椎追
之擊死數人父得脫省死於賊 至正南昌死義傳

許則祖字天則樂平人性剛居常習武事嘗歎曰大丈夫當
死國難至正間兵起剽掠則祖倡義兵誓曰從令者賞犯
令者誅克復德興踰年兵復來號數十萬則祖戰連捷乘
勝追之馬陷潭泥中遂遇害事聞賜諡忠顯 同上

王銓字伯衡安仁人登進士歷官温州守時郡受兵銓被執

不屈死其女聞之亦抱子赴水自溺 同上

黃復圭字均瑞安仁人博學以詩鳴至正兵起復圭陷賊庭
為詩罵之賊怒將剖其腹罵曰腹可剖赤心不可剖遂死
之 同上

甘復字克敬餘干人至正中與甘彥初張可立從學於張仲
舉為士林推重有詩集明成化中其孫琥始刊行 山窓遺

藁序

按甘復志書多不載今采劉憲所撰詩集序增入

周伯琦字伯溫饒州人父應極至大間為翰林待制伯琦自
幼從宦游京師入國學為上舍生積分及高等去以蔭授
將仕郎南海縣主簿三轉為翰林修撰改宣文閣授經郎
教戚里大臣子弟每進講輒稱旨帝以伯琦工書法命篆

西江志 卷八十八
宣文閣寶仍題扁宣文閣及摹王羲之所書蘭亭序智永所書千文刻石閣中嘗呼其字伯溫而不名會御史奏風憲宜用近臣特命僉廣東廉訪司事八年召入為翰林待制預修后妃功臣列傳累陞直學士除兵部侍郎與貢師泰同擢監察御史兩人皆南士之望一時榮之遷崇文太監兼經筵官出為江東肅政廉訪使長槍鎖南班陷寧國伯琦與僚佐倉皇出走至杭州除兵部尚書改浙西肅政廉訪使丞相達識帖睦爾承制假伯琦叅知政事招諭平江張士誠留平江者十餘年士誠既滅伯琦乃得歸鄱陽尋卒伯琦儀觀溫雅粹然如玉雖遭時多艱而善於自保博學工文章而尤以篆隸真草擅名當時嘗著六書正譌說文字原二書又有詩文藁若干卷

元史

按伯琦所著名近光扈從集據林志葉蘭傳伯琦明初曾應召而史傳不載

蔡深字淵仲樂平人以春秋中浙江鄉試授柯山書院山長轉徽州學教授值時多難歸不復起明初訪求宿學饒守陶安首薦詣公車以疾懇辭己酉江西設科舉藩省禮致司文衡得臨川吳伯宗發解廷對狀元及第人咸服其識鑑

人物志

徐素字淡如先籍餘干元末兵起挈家饒城遂為鄱人性穎博學邃於易禮楷書得歐陽率更顏魯公法郡守陶安一見重之每公暇則延素咨諏民俗素傾心無隱為文善叙事著澹湖集十卷

同上

入為翰林編修出知南陽府有善政以疾卒所著有羣英
雜言及編輯詩粹數千卷 同上

費震鄱陽人博學多才洪武初以賢良徵授吉水知縣擢漢
中知府時歲歉盜起震發粟賑濟盜乃來歸即令占宅自
保後以事被逮朝廷以震良吏釋之為牧民者勸尋陞戶
部左侍郎進尚書奉旨定丞相御史大夫等官歲祿之數
刻石官署調湖廣布政使以老致仕 人物志

祝挺字正夫鄱陽人趙伯同鎮饒辟為叅隨尋除金壇縣丞
遷上海縣時海濱盜起大姓錢鶴臯因煽亂率眾逼縣治
挺於黃浦東植義旗率眾聽約束皆嚙指誓逆黨亦投戈
旗下請死餘奔海欲謀叛挺遣唐翼等追斬之適謀報驃
騎已至松江將屠上海挺即函二首獻俘馳告曰民已定

矣驃騎猶欲窮治脅從者挺曰彼誑誤者何罪不則仍罪
我遣吏報克復功於相國事乃已是時他邑死傷相枕藉
而上海獨晏然擢戶部主事調浙江行省郎中以事去官
同上

余應鳳字士韶德興人洪武初有薦其才於朝者徵授本邑
訓導後兩典郡庠兩使絕域竣事即乞歸洪武十七年詔
徵山林隱逸應詔至闕太祖親試稱旨得賜遊御苑上親
與聯詩各二句成一律授山東布政司叅議勤咨訪明聽
斷清譽著聞考滿赴闕值戶部侍郎郭桓敗贓問刑官嗾
桓妄稱寄借滿天下朝臣以寄贓得罪者數千人禍且不
測應鳳辯其冤厲聲闕下乞帝廷鞫之忤旨廷杖卒於旅
邸御史丁廷敏等因劾奏問刑官妄扯平民上悟刑者伏

西江志 卷八十九
誅於是寃者俱得白 豫章書

張琬字宗琰鄱陽人以貢士試高等授給事中改戶部主事
一日帝問天下財賦戶口之數口對無遺帝悅立擢左侍
郎謹身殿災上言時政歲饑請蠲民租百萬餘石俱見嘉
納琬才敏有心計以疾卒官年二十七時人惜之 明史藁

按張琬明史藁無專傳附見楊思義傳後

周湏字伯寧鄱陽人江西十才子之一明太祖以唐宋皆有
成律惟元以一時行事為條格胥吏易為奸詔李善長等
定律令湏為大理寺丞亦預焉書成上稱善官至刑部尚
書 同上

按周湏明史藁附見周禎傳後事跡不詳今改撰十才
子者李正叔 初名宗頤 周伯寧劉原善辛敬萬石楊伯謙查

和卿周復其二人失攷

鄭倫字子夔饒之安仁人少攻問學暨長所交皆名流揭文
安虞文靖亟稱之湖南憲使趙之維薦授寶慶儒學正未
赴而天下兵起明太祖初取饒授叅贊江淮幕府專掌鹽
利以給軍上親征張氏倫叩馬獻策俘其驍將以病乞歸
自號環谷野人洪武乙丑再詔起於家至則年已八十賜
坐便殿詢以治道條對具悉欲處以重任以年老辭上親
製古詩一章以賜其歸又二年卒

按鄭倫事林志不載人物志所載失實今據天台林右
所撰環谷先生墓志補撰又王忠文集有鄭氏水木居
記止叙倫罷官後事茲不贅錄

鄭隆字德隆浮梁人洪武進士授行人出使有能聲還陳時

西江志 卷八十九 三
弊十事擢廣東僉事平反冤獄又遷山西叅議改廣西暨
乞歸妻於舟中語之曰君宦久妾止得一金環隆索觀而
歎曰吾生平與汝無愧於心又何用此即投水中聞者就
其地建棄金亭 安志

程溥字廣初德興人父士宏洪武初因督圖籍觸諱論死溥
以身代至京遇詔得免死黥役赴鳳陽役歸守者贈以金
不受曰吾為父來今得生還見吾父足矣人以其黥面稱
為鐵面佛 錢緒山集

劉仔肩字汝弼鄱陽人洪武初用薦召至京即集都人士詩
為雅頌正音而以已作附入草昧之初風雅賴以不墜 明
詩綜小序

祝孟獻字丕文德興人洪武間御史張宣薦授太僕少卿掌

馬政有區畫上元江寧有抵罪徙雲南者數千家已就道
獻力奏免使朝鮮渡鴨綠江舟遇風幾覆焚香告天須臾
風息至其國遺以金帶辭弗獲回至江邊解帶還之 人物志

王溥安仁人仕陳友諒為平章守建昌太祖命將攻之不克
友諒將李明道等寇信州胡大海往援擒明道及溥弟漢
二歸於行省李文忠命二人招溥是歲太祖征漢拔江州
溥遂遣使降命仍守建昌明年太祖次龍興率其眾來見
數慰勞從歸建康賜第聚寶門外尋遣溥取撫州及江西
未附諸郡縣復從克武昌進中書右丞兼詹事府副詹事
從大將軍北伐屢有戰功尋擢河南行省平章初溥未仕
時奉其母葉避兵貴溪遇亂與母相失凡十八年及是請

歸省墳墓許之且命禮官具祭物溥歸率士卒之貴溪桃源山求不得晝夜號泣者三日居人吳海言夫人為賊逼投井中死矣溥求得井有鼠自井出投溥懷中旋復入井遂汲井索之母屍果在哀呼不自勝乃具棺斂即其地葬之溥卒子孫世襲指揮同知

明史藁

戴壽字仲才浮梁人從吳仲迂游避居講學明初累薦不起時定賦役法浮梁獨重於他邑壽上章亟言得與他邑均邑民至今賴之所著有東山集

林志

徐文郁字晦之浮梁人洪武初應詔上顧問曰天下如何治對曰君仁則治又問百姓如何安對曰有司得其人則安將授以官泣請歸養

同上

張煥然浮梁人父信立初坐註累得罪且死煥然請代上憐

而兩赦之樵李楊昇為之傳

同上

金良佐鄱陽人幼好學通經史洪武十五年詔求賢才邑令以良佐應詣京帝咨問備至奏對稱旨拜廣東右布政使十八年被召入京卒

人物志

高貞字景瓚以字行樂平人以明經薦知休寧擢大理右寺副帝時以嚴勝寬犯重者每不釋景瓚奏讞必擇犯輕者列於前帝首覽輕犯多輒肆赦全活者眾卒於官

安志

計澄字本清浮梁人知永康調商河擢監察御史以直言忤時謫廬州推官起守楚雄政為滇列郡最陞廣西按察使

同上

章復字彥復鄱陽人仕元歷行省檢校洪武元年下湖湘得百粵地授全州府同知值旱蝗徒跣詣覆金山叩禱輒應

民勒石頌功全故闕守六年即陞復為守先後三閱考嘗
 樹松夾道百里以憩行人至是陰可覆路行者呼章公松
 尋改全為州移知保寧府逾年乞致政乘傳歸復器宇凝
 重學問該博尤工篆隸

人物志

李泰號西珉德興人元至正兵亂倡義兵保閭里明太祖知
 其名遣使聘之從駙馬王克恭守新安改文秩歷官刑部
 侍郎戶部尚書

同上

王和字叔和德興人洪武初以選貢擢太常博士丁外艱起
 復雲南亦佐縣知縣時越州反地隣亦佐西平侯將兵擊
 之兵已壓境和謁侯以身家保民無他辭甚激切侯令速
 馳赴邑邊疆各豎木牌以表識兵過秋毫無犯民胥感曰
 我公以木牌活一縣造庭羅拜而去調江山縣陞建州知

州兗州府知府改武昌卒於官

安志

蔣惠字貴和鄱陽人太祖征陳友諒於鄱陽惠上書謁見遂
 留叅政務洪武元年授廣東行省左司員外遷禮部郎中
 坐事左遷華亭知縣時舊令誣伏平民李秀三等二十人
 為盜惠察其枉悉釋之密授捕兵方畧獲真盜正其罪民
 頌之後以鈔本事去官

人物志

操琬字公琰樂平人少博學有才氣從程時登學一時朋遊
 如朱公遷董彛皆邃義理汎博古今琬摩礪其間所造益
 深元至正四年舉於鄉歷池州學錄洪武初詔起山林遺
 逸之士預修元史琬年七十餘入館閣帝命儒臣與談論
 酬荅如響舉事無所遺尋以疾歸田里

府志

程本初名本以字行樂平人洪武間舉明經授南陽同知南

陽久經兵革蹂躪公宇燬滅百姓流離本初極力懷綏建
公署學校繕城池相度經營吏服其能民安其業

人物志

方素易名岐以字行樂平人洪武間舉明經訓導淮安府擢
知盱眙縣以母憂去百姓赴闕乞留帝嘉之賜鈔錠衣物

以旌其能擢金華府有善政

同上

俞敬德浮梁人與同邑查仲原同登洪武初吳伯宗榜敬德
知海州兵燹之後極力撫循而流亡還定田野以闢仲原

通判肇州在嶺徼外善折疑獄動引春秋時並稱之

同上

江春字九齡鄱之新城鄉人至正末倡義兵保鄉閭徐壽輝
陷饒署春為左丞屯都昌香溪壽輝被陳友諒殺春思報
之遂歸附除權江南行省左丞隨上克江州豫章諸郡解
安豐圍敗友諒於康郎山除同知雄武衛親軍指揮使司

事遷同知振武衛繼從諸將下秦通湖蘇浙西諸州擒張

士誠定河南郡拜懷遠大將軍平雁門雲中守禦大同與

世襲大同衛指揮

同上

徐便字宗文鄱陽人幼習騎射鄉兵起推便為長便度兵少

依于光以自固歸附後光每有功能與焉授武畧將軍定

遼尉副千戶尋委攝遼陽府事至蓋牟迎敵度道隘因疊

冰成壘斷歸路大有俘獲進階武毅將軍尋以功擢明威

將軍僉海州衛指揮事卒便練達勇敢詰戎之暇手不釋

卷好歌詩每行次輒賦以紀事

同上

胡閏字松友鄱陽人太祖征陳友諒過長沙王吳芮祠見閏
題壁詩奇之洪武四年郡舉秀才入見帝曰此書生故題
詩鄱陽廟壁者邪授都督府都事遷經歷建文初選右補

闕尋進大理寺少卿燕師起與齊黃輩晝夜畫軍事燕王入京首召方孝孺草詔繼召閏及高翔三人至則衰經望闕慟哭聲徹殿陛乃趣閏先入諭令更服閏曰死即死耳服不可更也以族誅恐之不動命武士舉金瓜擊其齒齒盡抗聲不絕大怒命縊死以石灰水浸脫其皮實以草成人形懸武功坊即日籍其家子傳道與姻族二百十七人皆繫市駢斬之幼子傳慶及其外親之姻戚一百餘人俱戍邊閏妻汪氏縛就刑部時四歲女郡奴自懷墜或提入功臣家付爨婢牧之洪熙初赦還鄉貧甚誓不嫁嘉靖時提學副使邵銳立祠祀閏以郡奴祔福王時贈閏刑部尚書謚忠烈女郡奴謚孝貞

明史藁

按文燈巖集松友作梅友人物志妻汪氏作方氏

徐旭字孟昭樂平人洪武進士授浙江道監察御史改禮科又改庶吉士日記事侍上左右帝方屬意進士每朝羣臣退嘗留備顧問一日呼旭至前將有所任使而奏對弗克稱旨命分教於房山復教諭鳳陽擢知州事入史館上書論天下事多不能合遂自史館出為吏部考功員外郎永樂元年拜國子祭酒旭初在考功以天下之治教在守令與教官守令教官弗稱其任者尤精覆之無少貸及在太學亦如在考功時僅一年諸生凜凜謹自脩飭而僚屬之不便者譁然議調雲南叅議帝問吏部尚書蹇義曰旭為人何如對曰有文學持守而於人寡合帝曰持守之人固當寡合况兼有文學乎宜寘之近侍特命除翰林修撰四年考試春闈得疾卒

人物志

西江志 卷八十九
余仲敬德興人芑舒孫孩時便識日月字長讀書過目成誦
為文操筆立就曾赴浙闈與同輩詣望江亭觀濤遂成吳
山賦雄壯跌宕眾皆歎服試不偶退而潛心周程之學大
有所得江淮兵起里中豪傑以舉義諮仲敬力言不可散
之避亂深山雖顛沛流離講學不輟洪武初中江西鄉試
不欲官歸闕一軒扁曰靜學讀書先六經及子史至相卜
地理亦造閩與郡守陶安雅重之薦於朝累徵不起 府志
程萬恭樂平人太祖起兵和州見萬恭才幹卓異授總兵檢
校命理宣州值蘄黃賊侵宣境有致仕尚書汪澤民率義
兵拒賊力戰弗克萬恭馳逐尚書幕下俱被殺子蕤賓蔭
補國學 人物志

劉昂字彥昂鄱陽人元季兵亂與弟煜結里閭相保寇至却

走聞安慶左丞余廷心賢往依之余待以國士計孤軍不
振辭歸說叅政于光曰當今豪傑無可望者惟金陵仁義
之師盍就之以立功光喜即遣昂往金陵太祖嘉之留叅
贊帷幄久之命叅贊沐總制守鎮江尋授廣武衛親軍指
揮使司知事未幾苦目疾得請還鄉復徵大都督府掌記
乞外補知東阿縣尋引疾歸著有春雨軒集 同上

洪初字善初樂平人少師朱公遷為詩經學公遷作詩經疏
義初旦夕左右面錄所草卒賴以傳洪武初舉明經署本
縣學訓導用薦知開封府洧川縣 同上

王琛字廷實鄱陽人邃於易肆力問學雖遭時亂不廢知府
陶安雅善琛洪武九年辟為邑庠訓導後舉應明經科引
疾辭強起之詣京復力辭尋卒 同上

黃季倫別號淳齋鄱陽人自少窮墳典有才識任學博未幾
至正兵亂解組歸洪武初詔修元史

安志

劉琮玉字潤芳鄱陽人博通經史百家言陶安覽其詩題集
曰清華琮玉純孝母病籲天求代及葬廬於墓撫從弟妹
恩愛篤至

人物志

余彥誠德興人洪武初以薦對策稱旨授安陸州知州積逋
未完被逮者民數百人疏其善政請於朝帝意其要結付
法司嚴勘得實陞永州知府時洞寇猖獗彥誠以計擒賊
又恩撫之厥後洞蠻畏慕相率詣府請親詣其地彥誠坦
懷竟從請歲臨觀以為常諸蠻信而化之尋陞浙江布政
司叅議永樂初郡民詣闕借留復調永州知府陞河東轉
運使

人物志

余士美字實夫德興人洪武間為本邑訓導遷國子助教帝
幸太學命講舜典稱旨賜座褥尋陞磁州知州靖難兵起
有王千戶者乘機為變士美劾奏之反為所誣謫海州煎
鹽再謫泗州從戎革除後周王新復國上書求為輔導官
除周府紀善府寮皆新進士美一老歸然其中有過必諫
王獵得奇獸問諸寮莫辨士美曰此騶虞也王獻之朝唐
賽兒以妖術作亂王設兵備之事聞逮王并闔府屬皆以
輔導不恭論死獨至士美帝曰此老朕知其素忠特釋之
復其官乞休

同上

盧福安餘干人以吏員授巡檢時交趾叛福安當其衝夜夢
神語見紅綠二旗攻之必勝次日如其言三戰三捷事聞
超陞兵部主事踰時賊復熾遂戰死

安志

張里字示仁德興人涉獵經史有東山集明初平偽齊里董
戰艦叙功當遷以母老辭

人物志

孟常字德常鄱陽人幼有志操洪武二十七年詔求才幹邑
令授蘇州崑山知縣未幾改池州建德邑有蘆束及秋苗
逋負累歲徵之不能具常詣闕懇陳得以鈔代部使者言
其失職因謝歸永樂元年仍起知建德累考書最留從事
秋官調知真定之涑水後致仕

安志

莊叔淵鄱陽人貌魁梧負才器有詩名性好遊上會稽浮河
洛抵閩海而返趣益高例歲貢材能一人邑令任勉舉叔
淵銓曹每試高等授蘇州通判尋調寧波皆能其官永樂
四年求賢詔下寧波復以叔淵應陞知府提調交趾金冶
事踰二年疾卒

同上

朱智字存禮鄱陽人博學多才工古文詩歌洪武間辟為郡
掾後薦授靖江王府紀善宣德六年以老致仕善真行得

晉人書法

同上

祝原慶德興人父德忠坐罪且死原慶冒父名代死大司馬

孫原真傳其事

林志

董阜民字德之德興人以明經任工部主事時同官有被譖
繫獄者阜民疾篤恐其罹刑置諫疏於懷死都門上憐其
死諫命禮葬之遂赦被譖者

同上

按祝董二人豫章書人物志不載林志不詳時代或云
永樂中人

王仲壽字亮中樂平人永樂進士以翰林庶吉士預修永樂
大典除山西道御史陞河南右叅議改湖廣水滌著聲寮

宋屈服朝論欲大用之竟以老引年還 人物志

吳惠字澤民浮梁人永樂進士知永興兵部尚書鄺埜薦其

賢陞解州知州其俗視永興尤甚惠痛革其弊州輸邊儲

挽運甚勞立貧富三等法且聽其附載貨物以易粟上倉

費煩減半輸亦告足卒於仕 林志

黃信中餘干人永樂初知樂清縣奸人給寡婦至京誣告鄉

人謀叛已而逸去有司繫其婦以聞詔行會鞠信中廉得

其情獲全者眾盜殺一家三人獄久不決信中禱于神得

真盜後調知錢唐課最當遷特擢杭州知府 明史藁

賀祖嗣字思恒鄱陽人永樂進士授刑部主事歷郎中擢行

在大理少卿為人廉介精法律任棘寺一十九年讞鞠明

允漢府以逆受誅議屠所部祖嗣力言乃止正統九年出

知光州尋致仕孫霖字時望成化進士歷官蘇州知府亦

廉明有聲 安志

孫原貞名瑀以字行德興人永樂進士授禮部主事歷郎中

英宗初用薦擢河南右叅政初永樂中徙江南富戶於北

京逃且絕則於其鄉僉補原貞請令官吏大戶犯死罪者

免其運磚補富戶數從之遷浙江左布政使正統末閩浙

盜大起雖更赦罷兵原貞策其必叛圖上方畧請為備禦

計賊果再叛發兵討命原貞參議軍事深入擒其魁而溫

州餘賊猶未滅命都指揮李信為都督僉事調軍討之遂

拜原貞兵部左侍郎參軍務鎮守浙江搗其巢俘斬賊首

陶得二等追還被掠男女捷聞璽書獎勵遭母喪奪情復

分兵勦平餘寇奏析麗水青田二縣地增設雲和宣平景

西江志 卷八十九
寧三縣建官置戍盜患遂息論功進秩二等景泰三年進
兵部尚書鎮守如故未幾命考察福建庶官因留鎮焉福
州建寧二府舊有銀冶因寇亂罷朝議復開原貞執不可
乃寢五年冬疏言四方屯軍率以營繕轉輸諸役妨耕種
宜簡精銳實伍餘悉歸之農時不能盡用後劉千劬等之
亂果如原貞所料已復移鎮浙江罷歸家居十餘年卒年
八十七原貞所至有勞績其在浙江名尤著 明史藁
徐爵字宗器餘干人永樂進士授監察御史立朝謇諤風力
素勁人不敢干以私太宗常以小御史呼之 林志

戴弁字士章浮梁人領鄉薦訓導崇陽召拜兵科給事中奉
旨行邊陞陝西叅議城迭烈以禦寇衝屯張掖以助軍餉
進湖廣叅政調廣東適廉雷諸郡猺獞梗化挺身出諭之

曰我戴叅政也爾輩何敢冒死爲此賊羅拜而退廣州被
圍乏食亟發廩賑之募敢死士焚其攻具遣使間道引援
兵入卒平之進布政使丁內艱詔奪情視事以疾乞歸從
子瑞字廷美登進士選翰林庶吉士授吏部主事陞郎中
珉字廷振登進士授兵部主事轉郎中璉字廷獻登進士
授大理評事蓋一時稱盛云王文端公爲志墓 人物志

按戴弁所著有蒙菴集

方冊字載道德興人永樂進士選翰林庶吉士時交趾初置
郡縣選經術疎通識達治體者改授當道縣令興學育才
風俗丕變尚書黃福鎮交趾聞冊多才略命捕平原大蠻
紅衣麻火輸叛寇比至諭以順逆賊各解去丁外艱補廣
東新興令拜監察御史巡山東廣東轉福建按察使砂尤

寇亂諸郡騷動冊馳奏朝命寧陽侯陳懋刑部尚書金濂
督兵討之冊言賊黨多被脅良民願先入撫之遂深入巢
穴招撫不戰而歸順復業者三萬六千六百餘賊勢日蹙
乃分路進兵討平之卒於官 同上

葉恕字如心樂平人永樂進士拜北平道御史適浙江温州
銀鑛大發廷議須以法官臨之遴選恕往比至規畫有條
尤槩冰著聲繼按浙江湖廣諸道振吏治肅紀綱所至郡
境晏然以事謫監利丞家居淡薄自持尤篤孝思構思親

堂以志永慕

安志

程善字本善鄱陽人永樂間鄉貢授舒城知縣多惠政以父
憂去舒民詣闕疏留服闋復任舒再丁內艱舒民留如前
詔允之如期起原官前後歷十八年秩滿又留以知州掌

舒城縣事兩自舒還蕭然一橐居宇不蔽風雨 同上

劉莘字志尹鄱陽人永樂進士授行人奉使歷齊魯閩蜀關
陝足跡遍天下宣德十年遷儀制員外調考功郎汰官吏
六百餘員擢福建叅議奏減課銀幾半調山東築河堤幾
千丈築臨清城十里爲人淳厚通達累仕六朝多著勞績

景泰二年疏乞歸

人物志

李復觀名光安仁人性敏敦行以易第進士永樂初知福建
邵武縣能以文學飭吏事不假鞭朴而民信服 同上

舒謨字愷政樂平人永樂進士知杞縣調旌德政尚慈祥廉
敏不苛百姓愛慕繼以憂改定海定海鄙遠壓於兵鎮舊
令苦掣肘謨律已處交一出於正式弁敬服之遂得竟所
施廷覲選留都臺理刑拜監察御史 同上

馮誠字志誠浮梁人以童子舉秀才有葉懋者易而侮之後
誠巡按陝西懋以貢任平遼衛倉官失職論死誠讞貸之
時稱長者臬楚楚王舅張顯祖殺人王爲賂而誠拒之論
如法其操守如此 安志

高峻字恒安餘干人宣德進士授監察御史巡按巴蜀平潘
松叛按畿內辨冤獄倭寇犯浙江勅峻以行且假便宜卒
成乃績官至浙江叅政 林志

按舊志以高峻爲永樂庚戌進士者訛庚戌宣德五年
也今據登科錄改正

葉昇字日新樂平人幼失怙事母惟謹母病篤刲股和糜以
進明日母遂愈子培十歲喪母號慟欲死父紓解乃止求
工對真刻母像置一龕晨夕告奠父卒復肖像合祀於堂

自少至老哀慕如一日蓋父子稱孝云 府志

王逢字原夫樂平人幼穎異不凡比長師事野谷洪初初之
學得於朱公遷公遷得之吳準軒準軒得之饒雙峯道脈
所自逢以心會焉乃厭科舉業研精道德性命之懿薦授
富陽訓不就退歸鄉塾宣德三年復以明經辟召見堅辭
不就職歸足跡不入城市毅然以斯道爲己任著有言行
志自書其廬曰松塢學者稱松塢先生 人物志

王弼字廷輔鄱陽人宣德進士正統間授戶科給事中歷兵
科都給事累上疏言時政會歲饑請蠲逋負再三諄切得
允陞順天府丞修山海居庸邊防有區畫進應天府丞累
疏乞歸卒於家 林志

何英字積中號梅谷鄱陽人性警敏不事詞章學於王松塢

得饒雙峯黃勉齋之傳累薦不起建玉溪書院以納天下
來學著有四書釋要詩經增釋易經發明崇祀鄉賢祠

林志

胡居仁字叔心餘干人聞吳與弼講學崇仁往從之遊絕意
仕進其學以主忠信爲先以求放心爲要因以敬名齋端
嚴凝重對妻子如嚴賓手置一冊詳書得失用自程考已
而築室山中四方來學者日衆皆告之曰學以爲己不求
人知著有居業錄居仁性行淳篤居喪骨立非杖不能起
三年不入寢門與羅倫張元禎友善數會於弋陽龜峯嘗
言陳獻章學近禪悟莊昺詩止豪曠此風旣成爲害不細
又病儒者撰述繁蕪謂朱子註參同契陰符經皆不作可
也督學李齡鍾成相繼聘主白鹿書院過饒城淮王請講

易傳待以賓師之禮是時吳與弼以學名於世受知朝廷
然學者或有間言居仁闇修自守布衣終其身人以爲薛
瑄之後粹然一出於正居仁一人而已卒年五十一萬曆
十三年從祀孔廟追諡文敬

明史藁

黃黎洲曰敬齋以有主言靜中之涵養即白沙所謂靜
中養出端倪宜其同門冥契而先生必欲議白沙爲禪
蓋先生近於狷白沙近於狂不必以此而疑彼也

劉傑樂平人正統三年任義烏縣丞爲政識大體設法預備
賑饑息虎患併糧區乞王忠文祭謚旱荒奏蠲糧稅上封
事十條採行其九秩滿民詣闕代留

人物志

黃璧字廷玉浮梁人登鄉薦任紹興同知性好學剛而有制
紹興志載其守潔政平民甚宜之秩滿去郡惟圖書衣被

而已同上

汪琰字廷用樂平人正統進士由行人擢監察御史貴州蠻獠諸溪洞猖獗少保于謙謂非汪北城不可請得琰按治與都御史王來等共經畫之貴州平代還軍民遮道願留按浙江病滯輒發粟賑貸嫠富民私隣婦而殺其女獄無証累年有烏為冤然聲琰廉之即烏所止處得其屍論如法擢山東副使值濟南道蝗輶車捕蝗平反無辜且上言山東為朝廷咽喉凡徭役糧草皆宜停罷用甦民困以母喪歸貴州盜復起朝議用琰即家起復之卒於道同上

葉冕字拱辰鄱陽人正統進士授南京刑部主事擢知松江府廉明公正鋤強植弱民畏而服之時連歲饑饉冕悉力賑救賴以全活者甚衆府有澱山湖其半屬崑山界湖堤

壞彼此莫肯修冕槩視之為築萬餘丈蘇人愧之秩滿陞

山東叅政晉副都御史致仕同上

鄭冕字宜端樂平人正統進士拜監察御史適兩淮饑冕至發倉廩賑貸招還流亡天順間總戎石亨怙寵擅威福冕偕臺僚論其奸亨訴於上盡遷謫之臺諫一空冕得衡山尹至則歛惠一邑務綏生民歷六年亨敗始用薦者擢知衡州府以禱雨遘疾歿於官同上

劉濟字時用鄱陽人正統進士授兵部主事陞郎中改吏部孜孜以汲引為務惟恐遺才進左通政預知制誥同上

余亢字拱辰德興人正統舉人歷事都察院考異材特授監察御史操法嚴謹彈劾無所顧避為臺長所擠謫知寧海縣執法一如御史時以外艱去職同上

童軒字士昂鄱陽人景泰進士授南吏科給事中英宗復辟上疏言弭盜安民數事切時弊改戶科給事中憲宗踐祚首上疏言帝王之治在先本而後末簿書刑名其末也優詔荅之四川盜起廷議軒才識足任馳至賊巢宣布朝廷恩威賊羅拜以降進都給事中明年賊復猖獗謫壽昌知縣六年擢雲南提學僉事召拜太常寺少卿進本寺卿以都察院右副都御史提督松潘軍務疏言松茂戍守甚艱宜調兵設衛守之四處要路各設倉以便轉輸凡八害三利條畫以聞擢南京吏部侍郎署禮部尚書三疏懇求致仕所著有清風亭藁枕肱集

林志

按童軒所著尚有海岳涓埃喻蜀藁邊錄等書

劉城字廷高鄱陽人自少磊落有大志景泰順天鄉薦選授

監察御史俵馬直隸山東河南巡按鳳陽陝西督餉貴州雅著風裁陞福建副使上杭盜起詔起都御史高明勦之高輿疾以兵事屬城城深入大捷梟渠魁散脅從請立巡司又擇其幼者充生員次充吏使漸染於化高備疏其績歷陞按察使廣西右布政使右副都御史巡撫河南

同上

戴琥字廷節浮梁人景泰鄉薦授監察御史劾罷巡江不職二重臣又疏論南京大臣考察僚屬次第新郡邑學宮增府首濬范文正公清白泉以勵僚屬次第新郡邑學宮增祀鄉賢獨黜虞世南埋蘭亭石刻葺會稽宋諸陵置典守洒掃水旱歲饑奏蠲民上供再饑奏蠲三之一築堤數十萬丈捍海得田四萬餘畝民稱戴公堤又築橫塘壩而斥鹵地多可田建柘林等處七閘立石刻木示民時啓閉蓄

洩去日民扳號塞道擢廣西左叅政疾劇乞歸

紹興府志

戴珊字廷珍浮梁人父嘒由鄉舉官嘉興教授有學行珊幼嗜學天順進士擢御史督南畿學政歷浙江按察使福建布政使終任不攜一土物弘治二年擢右副都御史撫治鄖陽蜀盜野王剛流劫竹山平利珊討擒其魁入歷刑部左右侍郎與尚書何喬新彭韶共事進南京刑部尚書召為左都御史考察京官珊廉介不苟合給事中吳舜王蓋自疑見黜連疏詆吏部尚書馬文升并言珊縱妻子納賄珊等乞罷帝慰留之下舜蓋詔獄命文升珊即舉察事珊等言兩人逆計當黜故先劾臣等今黜之彼必曰是挾私也苟避不黜則負委任而使詐諉者得志帝命上兩人事蹟皆黜之帝晚年召對大臣珊與劉大夏造膝宴見尤數

一日與大夏侍坐帝曰時當述職諸大臣皆杜門如二卿者雖日見容何害袖出白金賚之曰少佐而廉且屬勿廷謝曰恐為他人忌也珊以老疾數求退帝語大夏曰朕以天下事付卿輩猶家人父子今太平未兆何忍言歸大夏出以告珊珊泣曰臣死是官矣帝既崩珊以新君嗣位不忍言去力疾視事疾作卒於位贈太子太保謚恭簡

明史

蒙

吳中字時中樂平人景泰進士授清流知縣改知東莞才名藉甚都御史韓雍鎮兩廣時洞獠猖獗率兵征勦中先期令四門出入者人截一袂實糗糧裹之軍至人給一囊而去韓以為能因薦守廣州拊循一方僚屬翕然嚮化繼改梧州治績如蒞廣州時擢貴州叅政陞左布政

人物志

胡靖字汝寧德興人初名德盛英宗賜名靖第進士授御史
慷慨任事風裁凜然轉陝西僉事時值寇亂邊務方殷靖
措置嚴密境內寧謐為湖廣按察使陞山東布政使歷官
三十年所至雖楮墨僅取充用俸祿自給外不留贏餘布
袍蔬食家無積粟居無寧宇嘉靖間建祠祀之

人物志

趙哲字民彝餘干人天順己丑就試銓曹葉盛奇其策授衡
州同知憂去改嘉興時楊繼宗作守哲寬以濟之嘉甚苦
海潮多墊溺築堤捍之擢兩浙運同剗鹽弊更定三限法
民便課亦足上疏乞歸

同上

嚴彪字弼中鄱陽人天順己卯鄉薦就訓歸安改建陽擢縣
願復領教職冢宰尹旻歎以為難陞山陰學諭有兄弟爭
訟者責以叛天性且引咎自責兄弟感悟遂成友愛周生

漳事繼母孝歲試當黜亟白督學因以充貢由是士知激
勸敦行病足致仕歸自謂母老可就教職性淡可辭熱官
足病可蚤引退號三可人稱為三可先生

同上

黎福字天與樂平人天順進士授監察御史出知鎮江改知
寧國累官右副都御史撫治鄖陽以疾致仕福居官必稱
職其為御史數疏天下利病間及宮闈事按真定貴戚有
強占民田歷數御史不敢辨悉奪還之按四川平反冤獄
尤為川人所稱鎮江軍衛雜處武人暴虐無所忌民素苦
之及聞福來皆惴不敢犯鄖陽節制三省首察文武吏才
不當任者易置之流民安業以南京兵部侍郎卒

林志

丘霽字時雍鄱陽人天順進士歷官蘇州知府幼穎悟能詩
文工懷素草法負才子名著有草堂集

人物志

辜顯字主敬安仁人天順進士授吏部主事遷兵部郎中擢
 廣西叅政柳慶蠻獠雜處最稱難治推示誠信卒皆率服
 年五十致仕 同上

西江志卷第八十九

天下匪無間又官圖事對真或貴則亦
 軍國累官本臨林嶺史無亦狼題以幾煙台
 茶酥平天與樂平入天賦並士對並察而史出
 又山何處何野野三何入解解三百於於
 博思於歲以煙台題自歸母安何於於於
 寧寧顯母李意於常燦通白皆學因以交貢由吳士

